


明史藁

列傳自五十五
至五十九

四十二

575
52



漢書門類			
二	二	三	一
九	〇	一	〇
八	〇	五	〇
冊	架	函	號

內閣文庫			
三	二	三	漢
二	八	三	書
二	〇	一	
二	〇	一	
架	冊	號	類

內閣文庫			
番號	漢	2231	
冊數	80 (42)		
函號	281	40	

新刻納本




A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



© Kodak, 2007 TM: Kodak







明史藁

列傳第五十五

光祿大夫

經筵講官明史總裁戶部尚書加七級臣王鴻緒奉

敕編撰

王翺

李秉


年富

林聰

姚夔

葉盛

王翺字九臯鹽山人。永樂十三年。初試貢士於北京。帝思得北士用之。而北人登第率後。翺兩試皆上第。大喜。特召賜食。改庶吉士。授大理左寺正。左遷行人。宣德元年。以楊士奇薦擢御史。時官吏有罪。不問重輕。許運磚還職。翺請賊吏坐死。但許贖罪。不得復官。帝從之。巡按四川。松潘蠻竊發。都督陳懷駐成都。相去八百餘里。不能制。翺奏移懷松潘。而州縣及



7326

土司徧設社學。以興教化。英宗嗣位。廷議遣文武大臣出鎮守。擢翽右僉都御史。偕都督武興鎮江西。懲貪抑奸。吏民畏愛。正統二年。召還院。處州賊流劫廣信。命翽往捕。盡俘以還。松潘國師商巴。與都指揮趙諒有隙。諒誘執巴掠其財。與同官趙得誣以叛。其弟小商巴怒。聚眾剽掠。得請濟師。命翽及都督李安。軍二萬征之。而巡按御史白其枉。詔審機進止。翽至出商巴于獄。遣人招其弟。因撫定其餘黨。而劾誅諒。成得復商巴國師。松潘遂平。六年。代陳鑑鎮陝西。遼東將屢失機。詔翽往督軍務。翽以軍令久弛。寇至不力戰。因諸將庭謁。責以失律罪。命左右曳出斬之。皆惶恐叩頭。願效死贖。翽乃躬行邊。自山海關抵開原。繕城垣濬溝塹。五里爲堡。十里爲屯。

使烽燧相接。練將士室鰥寡。軍民大悅。又以邊塞孤遠。軍餉匱。緣俗立法。令有罪得收贖。指揮孫璟。鞭殺戍卒。其妻女哭之亦死。他卒訴璟殺一家三人。翽曰。卒死法。妻死夫。女死父。非殺也。命璟償其家葬葬費。璟感激。後參將遼東。追敵三百里。事李秉爲名將。九載滿進右副都御史。與總兵曹義等出塞。擊兀良哈。擒斬百餘人。獲畜產四千六百。進右都御史。諸將破敵廣平山。進左。脫脫不花大舉犯廣寧。殺掠萬三千餘人。會乘輿北狩。方用兵。止停俸半載。景泰三年。召還。掌院事。易儲加太子太保。潯梧徭亂。總兵董興武毅。推委不任事。于謙請以翁信陳旺易之。而特遣一大臣督軍務。乃以命翽。兩廣有總督。自翽始。翽至鎮。將吏讐服。推誠撫諭。徭人嚮化。部

內無事。明年入爲吏部尚書。初何文淵協王直掌銓多私。爲言官攻去。翱代一循成憲。天順改元。奪官保直致仕。翱始專部事。石亨欲去翱。翱乞致仕。已得請。李賢力爭乃留。及賢爲亨所逐。亦以翱言留。兩人相得歡甚。帝每用人必咨賢。賢以推翱。以是翱得行其志。帝眷翱厚。時召對便殿。稱先生不名。而翱年幾八十多忘。嘗令郎談倫隨入。帝問故。翱頓首曰。臣老矣。所聆聖諭恐遺悞。令此郎代識之。其人誠謹可信也。帝喜。吏部主事曹恂已遷江西參議。遇疾復入都。翱以聞。命以主事回籍。恂怒。伺翱入朝。摔翱胸。擗其面。大聲詬詈。事聞。下詔獄。翱具言恂實病。得斥歸。時服其量。五年加太子少保。憲宗立。進太子太保。雨雪免朝參。屢疏乞歸。輒慰留。數遣醫視

疾。疾甚乃許致仕。未出都卒。年八十有四。贈太保諡忠肅。翱在銓部。謝絕請謁。公餘恒宿直廬。非歲時朔望謁先祠。未嘗歸私第。論薦不使人知。曰。吏部豈快恩怨地耶。自奉儉素。景帝知其貧。爲治第鹽山。孫以廕入太學。不使應舉。曰。勿妨寒士路。壻賈傑官近畿。翱夫人數迎女。傑恚曰。若翁典銓。移我官京師。反手爾。何往來不憚煩也。夫人聞之。乘間請翱。翱怒。推案擊夫人傷面。其自遼東還朝也。中官同事者重翱。盪明珠數顆。翱固辭。其人曰。此先朝賜也。公得毋以贓卻我乎。不得已納而藏焉。中官死。名其從子還之。爲都御史時。夫人爲娶一妾。逾半歲語翱。翱怒曰。汝何破我家法。卽日具金幣返之。妾終不嫁。曰。豈有大臣妾嫁他人者。翱卒。妾往奔喪。其子

養之終身。李賢嘗語人曰：「臯陶言九德，王公有其五。亂而敬，擾而毅，簡而廉，剛而塞，強而義也。然性頗執，嘗有詔，舉賢良方正，經明行修，及山林隱逸士，至者率下部試，黜落百不取一二。性不喜南士。英宗嘗言：「北人文雅不及南人。」顧質直雄偉，緩急當得力。翱由是益多引北人。晚年徇中官郭聰囑，爲都御史，李秉所劾，翱自引伏，蓋不無小損云。子孫世官錦衣千戶。

李秉字執中，曹縣人。少孤力學，舉正統元年進士，授延平推官。沙縣豪誣良民爲盜，而淫其室，秉捕抵罪，豪誣秉坐下獄。副使侯軌論豪如法，由是知名。徵入都察院理刑，將授御史。都御史王文薦爲本院經歷，改戶部主事。宣府屯田爲豪占。

秉往視，歸田於軍，而請罷科率。邊人賴之。兩淮鹽課弊覺，逮繫數百人，秉往覈，疑印有詐，搜得僞印，逮者得白。景帝立，進郎中。景泰二年，宣府督餉侍郎劉璉病，命秉往佐之。至則發璉侵牟狀，卽擢秉右僉都御史，代璉兼參贊軍務。宣府數遭寇，軍民牛具悉被掠，朝廷遣官市牛萬五千，分給屯卒，人予市穀種直，璉盡以畀京軍出守者，一不及屯卒。顧停其月餉，徵屯糧甚急，秉盡反璉政，厚恤屯軍，發帑市牛種，士卒自城守外，悉令屯作。凡使者至，及宦官鎮守，供億科斂者，皆奏罷之。以官錢給費，故事軍有家者，月餉一石，無者減十四。軍妻死，雖有父母兄弟，槩以無家論，秉力言其非，請優給之。帝方加意邊軍，覽宣府億萬庫所上財物數，悉命秉給諸軍，軍愈

感悅。三年冬，命兼理巡撫事。頃之又命提督軍務。秉益盡心邊計，不恤嫌怨。都指揮楊文、楊鑑，都督江福貪縱，劾罪之。守獨石內官弓勝，田獵擾民，請徵還。又劾總兵官紀廣、副總兵楊能罪，廣許秉自解。帝召秉還，而言官交章言，秉不當去。乃復命科道二人往廉之，卒留秉。先是寇亂邊地，民悉流移內郡。秉廣行招徠，奏給月廩，瘞土木、鷄兒嶺暴骸萬五千，乞推行於諸塞。軍為寇殺掠，家無依者，官為養贍，或資遣還鄉。所條奏百十章。帝及大臣知其賢，朝奏夕下。弊政悉釐，謀報寇牧近邊。廷議遣楊俊會宣府兵勦之。秉曰：「塞外故諸部牧地，非犯邊也。掩殺倖功，非臣敢聞。」乃止。諸部質所掠男婦，求易米。朝議成，丁予一石，幼者半之。諸部槩乞一石，鎮將不可。秉

曰：「是重粟而輕人也。如其言予之，而自請專擅罪。」帝以秉為識體。都督過興代紀廣，令每所出滑車三兩，諸城門積磚五千。寇至則磚塞門，車縶人上。秉論興恇怯，詔切責之。巡按賈恪奏秉興不協，秉亦許恪縱傲，勘至置秉不問。召恪還論罪。天順初，罷巡撫官，改督江南糧儲。初，陳泰為巡撫，以蘇松賦額不均，令民田五升者倍征。官田重者無增耗，賦均而額不虧。秉至一守其法。秉之巡撫宣府也。巡按張鵬以事相忤。至是鵬與御史楊瑄俱言事得罪，戍嶺表。梏甚嚴，過南畿，秉聞之出迎，急問兩御史舟安在。見兩人持之哭，錦衣林千戶者監行，為感動釋兩人。梏安行至戍所，無恙坐舉。知府違例被逮，帝念秉過微，令復任，請泚墅關稅，悉徵米備荒。內官金保

監淮安倉。秉發其科索罪。御史李周等左遷。秉疏救之。帝怒。將議罪。會廷議復設巡撫。大臣薦秉才。遂命撫大同。而都指揮孫英先以罪貶秩。還衛總兵李文。妄引詔書。令復職。秉至。卽斥之。裨將徐旺領騎卒操練。秉以旺不勝。任解其官。謫議紛起。會天城守備中官陳例久病。秉請易以羅付。帝遂責秉專擅。徵下詔獄。指揮門達。并以前舉知府。救御史。及斥孫英等爲秉罪。法司希旨。斥爲民。居二年。用閣臣薦。起故官。涖南京都察院。憲宗立。進右副都御史。復撫宣府。甫數月。召拜左都御史。成化改元。掌大計。黜罷貪殘。倍於其舊。明年秋。命秉自遼東抵大同。整飭邊備。至卽劾鎮守中官李良。總兵官武安侯鄭宏失律罪。出都指揮裴顯於獄。及舉指揮崔勝。傅海

等。擊敵鳳凰山。軍稍却。秉欲斬指揮徐英。英躍馬前。衆遂爭上山走敵。捷聞。璽書嘉勞。秉遂往巡宣府大同。更將帥申軍令而還。未幾。命爲總督。數破敵。帝勞以羊酒。賜麒麟服。加太子少保。吏部尚書王翱致仕。廷推代者。帝留待秉。至是擢任之。銳意澄仕路。監生需次八千餘人。請分別考核。黜庸劣數百人。咸怨秉。左侍郎崔恭。以久次當得尚書。而秉得之。右侍郎尹旻。嘗學於秉。秉初屈意從兩人。旣而不聽兩人言。兩人亦頗嫌秉。侍讀彭華者。大學士時從弟也。與中貴數干秉。秉不聽。胥怨秉。御史戴用。請兩京堂上官。及方面正佐。如正統間例。會廷臣保舉。帝納其言。且令兩京四品以上。吏部具缺。取上裁。御史劉璧。吳遠。馮徽。爭之。請仍歸吏部。語頗侵內閣。

帝怒。方詰責言者。會朝觀考察。斥退者衆。又多大臣鄉故。衆怨交集。而大理卿王槩亦欲去秉代其位。乃與華謀。嗾同鄉給事中蕭彥莊劾秉。言秉子爲令不職不能黜。而私布政丘陵孫遇。參政張穆。僉事李齡。陰結年淡御史助已。并羅織其十二罪。帝怒下廷議。恭旻助彥莊言。吾兩人諫之不聽。刑部尚書陸瑜等遂奏秉銜直沽名。顛倒銓政。乃落秉太子少保致仕。罷陵等四人官。而命彥莊指秉所結御史。久之不能對。則以璧等三人名上。遂俱下詔獄。出之外。陵等實良吏有名。以讒黜。衆議不平。陵尤不服。連章訐彥莊。廷訊陵詞直。帝惡彥莊誣罔。謫大寧驛丞。方秉被劾。勢洶洶且逮秉。秉謂人曰。爲我謝彭先生。秉罪惟上所命。第毋令入獄。入則秉必不出。

恐傷國體。因具疏引咎。畧不自辨。時天下舉子方會試集都下。奮罵曰。李公天下正人。爲奸邪所誣。若罪李公。願罷我等試。以贖及見帝。薄責秉乃已。秉行。官屬餞送。皆欷歔有泣下者。秉慷慨揖諸人。立登車去。秉去。恭遂爲尚書。秉誠心直道。夷險一節。與王竑竝負重望。林居二十年。中外薦疏十餘上。竟不起。弘治初卒。贈太子太保。後諡襄敏。子聰明智。孫邦直。皆舉鄉試。聰南宮知縣。以彥莊劾罷歸。明建寧府同知。智南陽知府。邦直寧波府同知。彥莊之謫丞也。署大寧縣。以科斂爲盜殺。并其家見戕云。

年富字大有。懷遠人。本姓嚴。後訛爲年。以會試副榜。授德平訓導。時甫踰冠。嚴重如老師。宿儒宣德三年。秩滿課最。擢吏

科給事中。糾正違失。務存大體。帝以六科任重。命科擇二人掌其事。乃以富與賈銓。竝掌刑科。都御史顧佐等。失入十七人死罪。富劾之。帝詰佐等。叩頭謝乃免。英宗嗣位。上言自永樂以來。招納降人。糜以官爵。雜處京邑。坐耗國帑。養亂招危。宜遣還故土。府軍前衛幼軍。本選民間子弟。隨侍青宮。今死亡殘疾。僉補爲擾。請於二十五所內。以一所調補。勿更累民。軍民之家。規免稅徭。冒僧道者累萬。宜悉遣未度者復業。議多施行。遷陝西左參政。尋命總理糧儲。陝西歲織綾絹。耗毼九百餘匹。永樂時。令織駝毼五十匹。遂以爲常。官吏諸生衛卒祿廩。以邊餉急。率減削。富請罷駝毼。復祿廩如故。諸邊將校占墾腴田。有至三四十頃者。富奏每頃輸賦十二石。都督

王禎以爲過。重疏爭之。廷議減三之二。遂爲定額。富又言臣所部。歲收二稅百八十九萬石。屯糧七十餘萬石。其間水旱流移。蠲除逋負。大率三分減一。而會計歲用。乃至百八十餘萬。入少出多。今鎮守諸臣。不量國計。競請益兵。餉何由給。請減冗卒。汰駑馬。杜侵耗之弊。帝可其奏。二邊士馬衆。供億浩繁。軍民疲遠輸。而豪猾因緣爲奸利。富量遠近定徵科。出入慎鈎考。宿弊革去。民困大蘇。性果毅。遇事敢爲。權勢莫能撓。聲震關中。然執法過嚴。僥倖多不悅。以是屢遭誣謗。秦中文武將吏恐失富。咸上章陳其勞。乃停俸。九載秩滿。遷河南右布政使。會有言富苛虐者。帝命覈舉主將坐之。吏部言。舉富者少傅楊溥也。帝意乃解。富至河南。歲饑流民二十餘萬。公

肆剽敝。巡撫于謙。委富輯之。皆定。土木敗後。邊境道阻。部檄富轉餉。無後期者。景泰二年。以右副都御史。巡撫大同。提督軍務。時經喪敗。法度廢弛。叢弊尤甚。富一意拊循。奏免秋賦。罷諸州縣稅課局。停太原民之轉餉大同者。武清侯石亨。武安侯鄭宏。武進伯朱瑛。令家人領官庫銀帛。糴米實邊。多所乾沒。富首請按治。詔宥亨等。抵家人罪。亨慮久雨壞關城。潛遣卒十餘人行視。卒遂越關抵大同。富復劾亨專擅。亨輸罪。已削襄垣王府菜戶。又杖其廚役之署教授事者。已又劾分守中官韋力轉。參將石彪。及山西參政林厚罪。豪家愈側目。相與撫富罪。巡按御史白其誣。遂不問。當是時。富威名重天下。而當事大臣于謙等。力保持之。故得行其志。遭母憂。詔乘

傳奔喪。起復視事。七年。富上言。往時諸邊雖設鎮守。監鎗內官。其數猶少。自土木變後。諸邊悉增。如陽和天城諸處。一城二人。擾民殊甚。今邊務稍寧。請減汰。事格不行。又言。高皇帝定制。軍官私罪收贖。惟笞則然。杖卽降用。徒流俱充軍。律明甚。近屢變更。犯賊者輕。皆復職。重惟立功。刑不足懲。更無顧憚。此皆法官過也。於是廷議流徒輸贖如故。惟於本衛差操。不得領軍矣。英國公張懋。及鄭宏各置田莊於邊境。歲役軍耕種。富劾之。還軍於伍。天順元年。革巡撫官。富亦罷歸。頃之。石彪以前憾。誣劾富。逮下詔獄。帝問李賢。賢稱富能祛弊。帝曰。此必彪爲富抑。不得逞其私耳。賢曰。誠如聖諭。宜早雪之。帝諭門達從公問。事果無驗。乃令致仕。明年以廷臣薦。起南

京兵部右侍郎未上改戶部巡撫山東道聞屬邑蝗馳疏以聞已改左副都御史巡撫如故官吏習富威名皆讐服豪猾屏跡東昌多降人頑獷弗率奏徙之南方四年春戶部缺尚書李賢舉富左右巧阻之帝語賢曰戶部非富不可人多不喜富此富所以爲賢也竟召任之乃酌贏縮謹出納躬親會計吏不能欺事關利害僚屬或不敢任富曰第行之吾當其責君輩毋署名可也由是部事大理丁父憂奪哀如初憲宗立富以陝西頻用兵而治餉者非人請黜左布政孫毓而用右布政楊瑑參政婁良西安知府余子俊吏部尚書王翱論富侵官請下於理富力辨薦賢爲國非有所私因乞骸骨帝不許竟黜毓然富性剛遂以此發憤病疽卒帝震悼諡恭定

初英宗諭李賢以六部皆得人如年富者尤不易得賢曰他日繼翺爲吏部非富不可至是劾富論者咎翺之專復富廉正強直始終不渝號稱名臣然頗好疑屬吏黠者故反其意嘗之多爲所賣

林聰字季聰寧德人正統四年進士久之授刑科給事中景帝嗣位進都給事中當是時四方多故聰慷慨論天下事無所諱中官金英家人犯法都御史陳鎰王文治之不罪英聰率同列劾鎰文畏勢縱奸并及御史宋璪謝琚皆下獄頃之復職聰又言璪琚不任風紀二人竟調外汪后父都督泉縱家人占民田六十餘頃聰等劾下家人獄還田於民中官善增督京營有寵宮室輿馬如王公朝士稍忤輒遭辱家奴白

晝殺人奪民產侵商稅聰白發其奸下增詔獄雖獲宥然卒不敢肆景泰三年春疏言臣職在糾察刑獄妖僧趙才興疎族百口律不當坐而抄提至京叛人王英之兄律不當逮家屬而俱配流所雖終見原然其始受害已不堪矣湖廣巡撫蔡錫以劾副使邢端爲所訐繫獄經年而端猶居職侍郎劉璉督餉侵隱不爲無罪然較之沈固周忱乾沒萬計孰爲重輕璉下獄追徵而周忱不問犯人徐南與子中書舍人頤俱坐王振黨當斬乃論南大辟頤止除名此皆刑罰之失平者帝是其言端下獄璉得釋南亦減死除名東宮改建以聰初有異論特遷春坊司直郎明年春學士商輅言聰敢言不宜置散地乃改吏科都給事中上言奪情非令典請永除其令

帝納之初正統中福建銀場額重民不能堪聰恐生變請輕之時弗能用已果大亂及是復極言其害竟得減免五年三月以災異偕同官陳八事帝多採納之吏部除副使羅篋爲按察使參政李輅僉事陳永爲布政使聰疏爭之并言山西布政使王瑛老宜罷篋等遂還守故官瑛致仕御史白仲賢以久次擢廣東按察使聰言仲賢奔競不當超擢乃遷鎮江知府兵部主事吳誠寅緣得吏部聰劾之遂改工部諸司憚聰風裁聰所言無敢不奉行吏部尤甚而內實疾之內閣及諸御史亦竝以聰好論建弗善也其年冬聰甥陳和爲教官欲得近地便養聰爲言於吏部御史黃溥等遂劾聰專制吏部下廷訊坐專擅選法論斬高穀胡濙力救帝亦自知聰止

貶國子學正。天順初，超拜左僉都御史，出賑山東饑，活饑民百四十五萬，還進右副都御史，捕江淮鹽盜，指揮吳斂等受盜賂，奏籍其家，戮盜魁數人，餘悉解散。母憂起復，再辭不許。曹欽反，將士妄殺報功，都下乞兒多失其首，市人不敢出戶。聰署院事，急令獲賊者必生致，濫殺爲止。錦衣官校惡欽殺，指揮遂臬，悉捕欽姻識，千戶龔遂榮，欽外舅，賀三亦在繫中。人知其冤，莫敢直。聰悉辨出之。他湔雪者甚衆。成化二年，淮南北饑，聰出巡視，貸漕糧及江南餘糧以賑，民德之。如山東進右都御史。七年，代王越巡撫大同。歲餘遇疾致仕。十年，以故官起，南院都御史，多不樂。御史言事，聰獨獎勵之，曰：「已不能言，又禁他人言可乎？」久之，召拜刑部尚書，尋加太子少保。

聰以舊德召用，持大體，秉公論，不嚴而肅。時望益峻。遼東巡撫陳鉞鎮守中官葉達、總兵官歐信等屢失事被劾，詔聰與中官汪直定西侯蔣琬按之。直欲庇鉞，而憚聰，淡敬禮以悅其意。聰亦稍委蛇。比具獄還，達信及副將韓斌等十七人竝貶秩奪俸，而鉞獨逃罪。論者淡爲聰惜。十八年，乞歸不得。卒於位。年六十八。贈少保，諡莊敏。聰爲諫官，嶽嶽敢言，嚴重不可犯，而實和易，不爲蘄絕之行。以故不肖者畏之，賢者樂就焉。當景泰時，士大夫激昂論事，朝多直臣，由聰倡也。

姚夔字太章，桐廬人。孝子伯華孫也。鄉會試皆第一。正統八年，授吏科給事中。陳時政八事。又言：「預備倉本賑貧民，乃發廩時，里甲慮貧民不能償，輒隱不報，致轉貸富室，倍稱還之。」

收穫甫畢。遽至乏絕。是貧民遇凶年饑。豐年亦饑也。乞勅天下有司。每歲再發廩。必躬勘察。先給最貧者。然後及其餘。帝立命行之。已奏古人立諡法。非爲死者加美號。蓋欲表媿惡。示勸戒也。請自今大臣無賢不肖。竝依古法加諡。先令太常博士議之。翰林院正之。然後吏部奏諸朝。而施行焉。章下禮部。胡澐言非故事。遂寢也。先薄京城。請急徵宣府遼東兵入衛。景泰元年。用薦超擢南京刑部右侍郎。尋就改禮部。奉勅考察雲南官吏。還朝留任禮部。景帝不豫。尚書胡澐在告。夔強起之。偕群臣疏請復太子。帝不允。明日夔欲率百官伏闕請。而石亨輩已奉上皇復位。出夔南京禮部。英宗雅知夔微聞。復儲議。驛召還。進左侍郎。天順二年。改吏部。知府某以貪

敗。賄石亨求復。夔獨執不可。遂止。七年。代石瑁爲禮部尚書。知貢舉。試院火。貢士死相藉。夔請諭祭於郊。祭畢伏地慟哭。觀者萬數。哀震數里。及再知貢舉。主司偶遺名士。力薦之。必得乃已。或謂非外簾事。夔曰。爲國得賢。安分內外。其愛惜人才如此。成化二年。帝從尚書李賓言。令南畿及浙江江西福建諸生。納米濟荒。得入監。夔奏罷之。四年。以災異屢見。率同列上言。陛下春秋鼎盛。而震位尚虛。宜均愛六宮。以廣繼嗣。此在陛下一轉移間。非求神奉佛所能致也。乞罷西山新建塔院。斥遠阿比哩之徒。勤視經筵。裁決庶政。親君子遠小人。節用度。愛名器。服食言動。悉遵祖宗成憲。以回天意。又言。今日之治。不在他求。惟守成化初政足矣。帝優旨答之。他所請

十事皆立報可。慈懿太后崩。中旨議別葬。閣臣持不可。下廷議。夔等言。太后配先帝。二十餘年。合葬升祔。典禮具在。一有不慎。違先帝心。損母后之德。他日有據禮議改者。如陛下孝德何。疏三上。又率羣臣伏哭文華門。聲徹大內。帝爲感動。固請周太后。竟得如禮。彗星見。言官連章劾夔納賄。夔憤力求去。慰留不允。時帝信番僧。有封法王佛子者。服用僭擬無度。奸人慕之。競爲其徒。夔力請裁汰。其徒稍減。五年。代崔恭爲吏部尚書。雨雪失時。率九卿陳時弊二十事。帝多採納。七年。加太子少保。彗星見。復偕文武羣臣陳二十八事。明年九月。南畿浙江大水。夔請命廷臣共求安民弭患之術。每遇災異。輒請帝賑恤之。明年卒。贈少保。諡文敏。夔才遠器宏。表裏洞

達。朝議未定者。夔一言立決。初佐吏部。卽留意人才。及掌銓。黜陟平允。王翱爲吏部。專抑南人。北人喜之。至夔。浚爲北人所疾。乃謠言。斬却姚夔頭。去祭王翱墓云。子璧由進士歷官。至兵部郎中。項忠劾汪直。璧預其謀。直搆忠詞。連璧。遂下獄。謫廣西思明同知。以瘴癘不敢往。居他府數年。謝病歸。夔從弟龍與夔同舉進士。除刑部主事。累官福建左布政使。善治劇。然乏清操。與右布政使劉讓同年。不相能。讓麤暴無禮。成化初。龍入覲。欲因夔去讓。而讓乃王翱鄉人。翱遂兩罷之。葉盛字與中。崑山人。正統十年進士。授兵科給事中。土木師覆。諸將多遁還。盛率同列請先正扈從失律者罪。然後選將練兵。爲復讐計。郕王卽位。例有賞賚。盛以君父蒙塵辭。不許。

也先迫都城。請罷內府軍匠。悉遣征操。又請令有司儲糧料。以給戰士。遣散卒取軍器於天津。張外援。三日間。章七八上。寇退。進都給事中。言勸懲之道。在明賞罰。敢戰如孫鏗。死事如謝澤。韓青當賞。其他守禦不嚴。赴難不力者。皆當罰。大臣陳循等議。召還鎮守居庸。都御史羅通。并留宣府。都督楊洪。掌京營。盛言今日之事。邊關爲急。往者獨石馬營。不棄。則駕何以陷。土木。紫荆。白羊。不破。則寇何以薄都城。今縱守京師。不過保九門而已。如陵寢郊壇。圻甸生靈。何。臣謂宜固守宣府。居庸。便時不能從。出安集。陳州流民。景泰元年還朝。言流民幸成編戶。然人雜五方。其情不一。鬪爭讐殺。時時有之。宜專官綏撫。又言。畿輔八府。旱蝗相仍。請加寬恤。帝多採納。京

師多災異。率同官請。令文武大臣。及臺諫官。竝降秩停俸。諸大臣俱請罪。京衛武臣。及其子弟。多驕惰。不習兵。盛請簡拔。精壯備操守。京城市廛。悉勲戚所置。月徵其稅。盛以國用不給。請籍之於官。以其稅佐軍餉。皆從之。明年。上弭災防患八事。帝以兵革稍息。頗事宴游。盛請復午朝故事。立報可。當是時。帝虛懷納諫。凡六科聯署建請。率盛與林聰爲之倡。廷臣議事。盛每先發言。往復論難與議。大臣或不悅。曰。彼豈少保耶。而若是。因呼爲葉少保。然物論皆推盛。以才擢右參政。督餉宣府。尋以李秉薦。協贊都督僉事孫安軍務。初。安嘗領獨石馬營。龍門衛所四城。備禦英宗旣蒙塵。安以四城孤懸。塞外勢難全。奏棄之內徙。至是。廷議修復。仍以命安。盛與闢草

萊葺廬舍。庀戰具。招流移。爲行旅。置煖鋪。請帑金買牛千頭。以畀屯卒。立社學。置義塚。療疾扶傷。兩歲間。四城及赤城鵬鶚諸堡。次第修復。皆爲完城。安遂進副總兵。而守備中官弓勝不相能。奏安疾宜代。帝以問盛。言安爲勝所持。故病。今諸將無踰安者。帝乃遣醫視安疾。已盛又劾勝。帝雖宥不問。然卒調之他鎮。父憂。詔奔喪。卽起復。英宗素知盛名。天順二年。召爲右僉都御史。巡撫兩廣。乞終制不許。瀧水瑤鳳弟吉肆掠。督諸將生擒之。兩廣盜蠡起。所至破城殺將。諸將怯不敢戰。殺平民冒功。民相率從賊。盛與鎮守中官朱詳言蠻出沒不常。有司輒瀆聖聽。自今攻劫城池者。始以聞。餘止類奏。疏至兵部。駁不行。海康民唐子注作亂。討斬之。尋與總兵官顏

彪屢破賊砦。彪濫殺冒功。盛不能盡禁也。六年。命吳禎撫廣西。而盛專撫廣東。憲宗立。議事入都。給事張寧等欲薦之入閣。以御史呂洪言而止。初編修丘濬與盛有郤。李賢入濬言頗不悅盛。及韓雍代盛。賢草雍勅曰。毋若葉盛之殺降也。稍遷左僉都御史。巡撫宣府。復舉官牛官田之法。墾田四千餘頃。以其餘積。市戰馬千八百匹。修屯堡七百餘所。邊塞益寧。獨石鎮守內官進保貪暴。偕御史展毓劾之。保被責。成化三年秋。入爲禮部右侍郎。偕給事中毛弘按事南京。還改吏部。出賑真定保定饑。議清莊田。分養民間種馬。置倉涿州天津。積粟備荒。皆切時計。滿都魯字羅出。亂加思蘭。駐牧河套。兵部尚書白圭議以十萬衆大舉逐之。沿河築城抵東勝。徙民

耕守。帝壯其議。八年春。勅盛往會總督王越。巡撫馬文升。余子俊。徐廷璋。詳議。初盛為諫官。喜言兵。嘗多論建。既往來三邊。知時無良將。邊備久虛。轉運復艱。搜河套復東勝。未可輕議。乃會諸臣上疏言。守為長策。如必決計戰。亦宜堅壁清野。伺其情歸。擊之。令一創。庶可遏再來。又或乘彼入掠。分遣精卒搗其巢。彼將反顧。內外夾擊。足以有功。然必守固而後戰。可議也。帝善其言。而圭主復套。師出竟無功。人以是服盛之先見。尋轉左侍郎。十年卒。年五十五。謚文莊。盛清修積學。尚名檢。薄嗜好。家居出入常徒步。生平慕范仲淹。堂寢皆設其像。志在君民。不為身計。有古大臣風。

明史藁

列傳第五十五終

明史藁

列傳第五十六

光祿大夫 經筵講官明史總裁戶部尚書加七級臣王鴻緒奉 敕編撰

項忠

韓雍張

余子俊阮

徐廷璋

朱英

秦紘

項忠字蓋臣。嘉興人。正統七年進士。授刑部主事。進員外郎。從英宗陷北庭。令飼馬。乘間挾二馬南奔。馬疲棄之。徒跣行。七晝夜。始達宣府。景泰中。由郎中遷廣東副使。按行高州。謀報賊攜男女數百。剽村落。忠戒諸將曰。賊無攜家理。勿妄殺。已訊所獲俘。果良民被掠者。盡釋之。從征瀧水。徭有功。增俸一秩。天順初。歷陝西按察使。歲饑。發廩不待報。母憂歸。部民

詣闕乞留。詔起復。七年。以大理卿召。民乞留如前。遂改右副都御史。巡撫其地。洮岷羌叛。忠言羌志劫掠。盡誅則傷仁。遽撫則不威。請聽臣便宜從事。報可。乃發兵據險。揚聲進討。卒降其衆而還。西安水泉。鹵不可飲。爲開龍首渠三十里。又疏鄭白二渠。以溉涇陽三原醴泉高陵臨潼五縣。田七萬餘頃。民祠祀之。陝西數苦兵。成化元年。忠上言。三邊大將。遇敵逗遛。雖才怯。亦由任輕。大將無生殺權。而敵能制其死命。士卒畏敵不畏將。是以戰無成功。苟假以威柄。嚴退怯之誅。彼知進則可生。退則必死。豈有冒必然之死。而不求生於一戰者哉。至廟堂舉將才。已踰一年。不聞有一人應詔。豈果無嫻習騎射。慄勇絕倫者。獨格於不能答策耳。今天下學校生徒。善

答策者。百不一二。奈何責武人。帝善其言。而所司守故事。不能用。毛里孩寇延綏。詔忠偕彰武伯楊信禦之。無功。明年。信議大舉搜河套。敕忠提督軍務。忠方赴延綏。而寇復陷開城。深入靜寧隆德六州縣。大掠而去。兵部劾忠。帝特宥之。搜套師亦不出。又明年。召理院事。四年。滿俊反。滿俊者亦名滿四。其祖巴丹。自明初率所部歸附。世以千戶畜牧爲雄長。仍故俗。無科徭。其地在開城縣之固原里。與邊鄰。俊獷悍。素藏匿奸盜。出邊抄掠。會有獄連俊。有司跡逋。至其家多要求。俊怒。遂激衆爲亂。守臣遣其姪指揮璫往捕之。俊殺其從者。劫璫與叛入石城。石城卽唐吐蕃石堡城。稱險固。非數萬人不能克者也。山上有城砦。四面峭壁。中鑿五石井。以貯水。惟一徑

可緣而上。故俊據以爲巢穴。自稱招督王。有衆四千。都指揮邢端等禦之。敗績。乃命忠總督軍務。與監督軍務太監劉祥。總兵官都督劉玉。率京營及陝西四鎮兵討之。師未行。而巡撫陳价等先以兵三萬進討。復大敗。賊因官軍器甲。衆至二萬。勢益張。關中震動。朝議欲益兵。忠上言。臣等調兵三萬三千餘人。足以滅賊。今秋深早寒。若更調他軍。恐往復需時。賊得遠遁。且邊兵不能久留。益兵非便。忠遂與巡撫馬文升。分軍七道。抵石城下。與戰。斬獲多。伏羌伯毛忠乘勝奪其西北山。賊大衄。幾破之。毛忠忽中流矢死。玉亦被圍。諸軍欲退。忠斬一千戶。徇衆懼而止。玉得出。乃列圍困之。適有星孛於台斗。中朝多言。占在秦分。不利西師。忠曰。昔李晟討朱泚。熒惑

守歲。此何害。日遣兵薄賊城下。焚芻草。絕汲道。賊益窘。欲降。邀忠與文升相見。忠偕劉玉單騎赴之。文升亦從數十騎至。呼俊疇。諭以速降。賊遙望羅拜。忠遂直前挾疇以歸。俊氣沮。猶豫不出。城外濠深十丈。不可渡。乃縛木爲橋。人負土囊填之。有賊夜出。汲被擒。忠貫其死。賜之金帶鉤。縱歸。使誘俊出。戰。伏兵擒焉。賊盡殲。於是毀石城。鑿石紀功而還。請於固原西北西安廢城。增一衛。留兵戍之。是役也。忠大小三百餘戰。親當矢石。不少避。論功進右都御史。與林聰協掌院事。白圭既平。劉通流民屯結如故。通黨李原復亂。僞稱平王。與王洪王彪等。掠南漳房內鄉渭南諸縣。六年。詔忠總督軍務。與湖廣總兵官李震討之。忠至襄陽。流民附賊者百萬。乃奏調永

順保靖土兵。而先分軍列要害。多設旗幟鉦鼓。遣人入山招諭流民歸者四十餘萬。彪亦就擒。時圭爲兵部。遣錦衣百戶吳綬贊參將王信軍。綬欲攘功。不利賊瓦解。縱流言。圭信之。止土兵毋調。忠疏爭。且劾綬罪。帝爲召綬還。而聽調土兵如故。合二十五萬。分八道逼之。流民歸者又數萬。賊潛伏山砦。伺間出劫。副使余洵都指揮李振遇之於竹山。乘溪漲半渡。截擊之。賊溺死。遂擒原洪。忠等移軍竹山。捕餘孽。復招流民五十萬。斬首六百四十。俘八百有奇。家口三萬餘人。忠乃戶選一丁。充戍湖廣邊衛。餘令歸籍給田。民有自洪武中占籍者。有司一切驅逼。不前卽殺之。其發戍者。舟行多疫死。給事中梁璟因劾忠妄殺。白圭亦言。流民旣成業者。宜隨所在著

籍。又駁忠所上功次互異。帝皆不聽。進忠左都御史。廕子綬錦衣千戶。諸將錄功有差。忠上疏言。臣斬俘皆首惡。今諸臣言皆良家子。不知前屢奏猖獗者爲誰。且圭亦嘗身任其事。濫殺數十萬人。今日之舉。又圭遺也。昔馬援薏苡蒙謗。鄧艾檻車被徵。功不見錄。身更不保。臣幸際聖明。願賜骸骨。勿使臣爲馬鄧之續。帝溫詔答之。忠復列上善後十事。悉允行。八年召還。與李賓協掌院事。後二年。拜刑部尚書。尋代圭爲兵部。汪直開西廠恣橫。忠屢遭侮。不能堪。會大學士商輅等劾直。忠亦倡九卿劾之。奏留中。而西廠遂罷。直深恨之。未幾西廠復設。直以吳綬爲腹心。綬挾前憾。伺忠益急。忠不自安。乞歸治病。未行。而綬嗾偵事者。誣忠受司禮太監黃賜請屬。用

劉江爲江西都指揮。給事中郭鏗。御史馮貫等。亦交章劾忠。詞連其子經。及興寧伯李震。彰武伯楊信等十三人。詔法司會錦衣衛廷鞫。忠抗辨不少屈。然衆知出直意。無敢爲之白者。竟斥爲民。賜與震等亦得罪。朝野皆不平。直敗復官致仕。家居二十六年。至弘治十五年乃卒。年八十二。贈太子太保。諡襄毅。忠侗儻多大略。練戎務。彊直不阿。敏於政事。故所在著稱。子經。經子錫。錫子治元。皆舉進士。經江西參政。錫南京光祿寺卿。治元員外郎。

韓雍字永熙。長洲人。正統七年進士。授御史。負氣果敢。以才略稱。出巡河道。已巡按江西。黜貪墨吏五十七人。廬陵太和盜起。捕誅之。鄧茂七反。巡按福建。御史汪澄。牒鄰境會討。俄

以賊議降。止兵。雍曰。賊果降。退未晚也。趨進兵。賊復叛。澄坐得罪死。人以是服雍。景泰二年。擢廣東副使。陳循薦爲右僉都御史。巡撫江西。歲饑。奏免秋糧。請宋文天祥謝枋得諡。詔諡天祥忠烈。枋得文節。時雍年甫三十。赫然而才望。所規畫措置。咸可爲後法。天順初。罷天下巡撫官。改山西副使。寧王劾其擅乘肩輿諸事。下獄奪官。起大理少卿。尋復爲右僉都御史。佐寇深理院事。錦衣指揮劉敬。坐飯石亨直房。用朋黨律論死。雍言。律重朋黨者。謂阿比亂朝政也。以一飯當之。豈律意。且亨盛時。大臣朝夕趨門不坐。獨坐敬何也。深歎服出之。母憂起復。四年。巡撫宣府大同。議事入覲。帝壯其貌。留爲兵部右侍郎。憲宗立。坐學士錢溥累。貶浙江左參政。廣西徭

獐流剽廣東殘破郡邑殆徧成化元年大發兵拜都督趙輔
爲總兵官以太監盧永陳瑄監其軍兵部尚書王竑曰韓雍
才氣無雙平賊非雍莫可乃改雍左僉都御史贊理軍務雍
馳至南京集諸將議方略先是編修丘濬上書大學士李賢
言賊在廣東者宜驅在廣西者宜困欲宿兵大藤峽扼其出
入蹂其禾稼期一二年盡賊賢善之獻於朝詔錄示諸將諸
將多主其說請令遊擊將軍和勇率番騎趨廣東而大軍直
趨廣西分兵撲滅雍曰賊已蔓延數千里而所至與戰是自
敝也今賊據大藤峽而以修仁荔浦爲羽翼當先收二縣以
孤賊勢大軍直搗其巢勢無不克巢旣傾餘迎刃解耳舍此
不圖而分兵四出賊益奔突郡邑益殘所謂救火而噓之也

衆曰善輔亦知雍才足辦賊軍謀一聽於雍雍等遂倍道馳
全州陽洞苗掠興安擊破之至桂林斬失機指揮李英等四
人以徇乃督兵十六萬人分五道先破修仁賊窮追至力山
擒千二百餘人斬首七千三百級荔浦亦定十月至潯州延
問父老亦言峽天險不可攻宜以計困雍曰峽延廣六百餘
里安能困之兵分則力弱師老則財匱賊何時得平吾計決
矣遂長驅至峽口儒生里老數十人伏道左願爲嚮導雍見
卽罵曰賊敢給我叱左右縛斬之左右皆愕旣縛而袂中利
刃出推問果賊也悉支解剝腸胃分挂林箐中纍纍相屬賊
大驚曰韓公天神也雍令總兵官歐信等爲五哨自象州武
宣攻其北身與輔督都指揮白全等爲八哨自桂平平南攻

其南參將孫震等二軍從水路入而別遣裨將分兵守諸隘口。賊魁侯大狗等大懼。先移其累重於桂州橫石塘而立柵山南。多置滾木礮石鏢槍藥弩拒官軍。十二月朔。雍等督諸軍水陸齊進。擁團牌登山鏖戰。連破石門林峒沙田右營諸巢。焚其室廬積聚。賊皆奔潰。伐木開道。直抵橫石塘。及九層樓。諸山賊復立柵數重。憑高拒。雍等誘賊發矢石。度且盡。躬督諸軍緣木攀藤而上。別遣壯士從間道直上山頂舉礮。賊不能支。遂大敗。先後破賊三百二十四砦。生擒大狗及其黨七百八十人。斬首三千二百有奇。墜溺死者不可勝計。峽有大藤如虹。橫亘兩崖間。雍斧斷之。改名斷藤峽。勒石紀功而還。分兵擊餘黨。鬱林陽江洛容博白。次第皆定。帝大喜。賜敕

嘉勞。召輔等還。遷雍左副都御史。提督兩廣軍務。雍乃散遣諸軍。以省饋餉。而遺孽侯鄭昂等遂乘虛陷潯州。及洛容北流二縣。雍被劾引罪。帝宥之。雍益發兵撲討。時諸賊所在蜂起。思恩潯賓柳城。悉被擾掠。流劫至廣東欽化二州。皆應時破殄。四年春。雍以兩廣地大事殷。請東西各設巡撫。帝可之。命陳濂撫廣東。張鵬撫廣西。而雍專理軍事。尋以憂歸。明年。兩廣盜復起。僉事陶魯言。兩廣地勢錯互。當如臂指相使。不可離析。近賊犯廣西。臣與廣東三司議調兵。匝月未決。賊益無所憚。乞仍命大臣總督便。會僉事林錦。巡按御史龔晟。亦以為請。乃罷兩巡撫。而起復雍右都御史。總督如故。雍遣參將張壽。遊擊馮昇等。分道討賊。忻州八砦蠻。及諸山猺獍。掠

州縣者。皆摧破之。蠻民素懼雍威。寇盜寢息。九年。柳潯諸蠻復叛。參將楊廣等俘斬九百人。方更進。而賊破懷集縣。兵部劾雍奏報不實。廣西鎮守中官黃沁素憾雍抑已。因訐雍。且言其貪欲縱酒濫賞妄費。帝遣給事中張謙等往勘。而廣西布政使何宜副使張敷銜雍素輕已。共醞釀其罪。謙還奏事。虛實交半。竟命致仕去。雍洞達闖爽。有雄略善斷。動中事機。每戰嘗躬親矢石。不目瞬。嘗與僚屬論兵。轅門提俘入。手斬數人。探心腦噉之。至盡。見者失色。雍談笑自若。自奉尊嚴。三司皆長跪白事。軍門設銅鼓數十。儀節詳密。裨將以下。繩柙無所假。兩地鎮守宦官素驕恣。亦惕息無敢肆。疾惡太嚴。過誅戮。揮斥財帛不少惜。故雖令行禁止。民得安堵。而謗議亦

易起。爲中官齟齬。公論皆不平。兩廣人念雍功。尤惜其去。爲立祠祀焉。家居五年卒。年五十七。正德間。謚襄毅。初以軍功予一子錦衣百戶。雍以授其弟睦。至是錄一子國子生。
張瑄字延璽。江浦人。正統七年進士。授刑部主事。歷郎中。有能聲。景泰時。賜敕爲吉安知府。俗尚巫迎神無休日。瑄遇諸途。投神水中。瑄邁危疾。父老皆言神爲祟。請復之。瑄怒不許。疾亦愈。歲大饑。陳牒上官。不俟報。輒發廩賑貸。居八年。用薦擢廣東右布政使。廣西賊莫文章等。越境陷連山。瑄擊斬之。又破陽江賊周公轉。新興賊鄧李保等。旣而大藤峽賊頻陷屬邑。瑄坐停俸。成化初。韓雍平賊。錄瑄轉餉勞。賜銀幣給俸如初。瑄按行所部。督建預備倉六十二。修陂塘圩岸四千六

百增築廣州新會諸城垣一十二。民德瑄惟恐其去。既轉左布政使。會滿九載。當赴京。軍民相率乞留。巡撫陳濂等爲之請。乃仍故任。八年。始以右副都御史。巡撫福建。平賊林壽六。魏懷三等。福安壽寧諸縣。鄰江浙。賊首葉旺。葉春等負險。瑄捕誅之。餘盡解散。帝降敕勞之。改撫河南。發趙王見濤。南樂王祁鉞。臨漳王祁鋈。湯陰王祁鏞。淫虐罪。革冠服。停祿。有差。議事入都。陳撫流民振滯才十八事。所司多議行。黃河水溢。瑄請賑。且移王府祿米於他所。留應輸榆林餉濟荒。石取直八錢。輸榆林。民稱便。還理院事。尋遷南京刑部侍郎。久之。進尚書。務守故事。晚節衰耄。政頗寬縱。二十年。星變見劾。帝弗問。居三年。給事御史復劾之。遂落職。孝宗立。復官致仕。

余子俊字士英。青神人。父祥。戶部郎中。子俊舉景泰二年進士。授戶部主事。進員外郎。在部十年。以廉幹稱。出爲西安知府。歲饑。發廩十萬石賑貸。區畫以償。官不損。而民濟。成化初。所司上治行當旌者。知府凡十人。而子俊爲首。以林聰薦。爲陝西右參政。歲餘擢右布政使。六年。轉左調浙江。甫半載。拜右副都御史。巡撫延綏。王銳爲巡撫。請沿邊築牆建堡。爲久遠計。工未興。會銳罷。子俊復言。二邊惟延慶地。平易利馳突。寇屢來犯。獲邊人爲導。徑入河套。爲屯牧。自是寇顧居內。我反屯外。宿留重兵。所費鉅萬。猶未寧息。莫若於沿邊築牆。置立堡砦。今舊界石所在。多高山陡崖。依山形。隨地勢。或剗削。或壘築。或挑塹。縣引相接。以成邊牆。於計爲便。尚書白圭以

陝民困。奏緩役。既而寇入孤山堡。復犯榆林。先後與朱永許寧擊敗之。是時寇據河套。歲發大軍征討。卒無功。八年秋。子俊復言。今因征套。延綏屯士馬八萬。芻茭煩內地。若今冬寇不北去。又須備來年軍資。姑以今年之數約之。米豆需銀九十四萬。草六十萬。每人運米豆六斗。草四束。應用四百七萬人。約費行資八百二十五萬。公私煩擾至此。安得不變計。臣前請築牆建堡。詔事寧舉行。請於明年春夏。寇馬疲乏時。役陝西運糧民五萬。給食興工。期兩月畢事。圭猶持前議阻之。帝不從。命子俊速舉。子俊先用軍功。進左副都御史。明年。又用紅鹽池搗巢功。進右都御史。寇以搗巢故遠徙。不敢復居套。內地患稍息。子俊得一意興役。東起清水營。西抵花馬池。

延袤千七百七十里。咸鑿崖築牆掘塹。其下連續不絕。每二三里。置敵臺崖砦。爲巡警之所。又於崖砦空處。築短牆。橫一斜。二如箕狀。以瞭敵避射。凡築城堡十一。邊墩十五。小墩七十八。崖砦八百十九。役軍四萬人。不三月而成。牆內之地。悉分屯墾。歲得糧六萬石有奇。十年閏六月。子俊具上其事。因以母老乞歸。慰留不許。初。延綏鎮治。綏德州屬縣。米脂吳堡。悉在其外。寇每輕騎入掠。鎮兵覺而追之。已不及。故往往得利去。自子俊徙鎮榆林。增衛益兵。拓城置戍。攻守器畢具。遂爲重鎮。寇抄漸稀。軍民得安耕牧焉。明年。移撫陝西。子俊知西安時。以居民患水泉鹹苦。鑿渠引城西涵河入灌。民利之。久而水溢無所洩。至是。乃于城西北。開渠洩水。使經漢故城。

達渭。公私益便。號余公渠。又於涇陽鑿山引水。溉田千餘頃。通南山道。直抵漢中。以便行旅。學校公署。圯者悉新之。奏免岷河洮三衛之戍。南方者萬有奇。易置南北之更戍者六千有奇。就成本土。岷州栗林羌爲寇。子俊潛師直抵其所。倚山設伏。羌覺而遁。伏兵起追之。羌大潰。名爲兵部尚書。奏申明條例十事。又列上軍功賞格。由是中外有所遵守。緬甸酋卜刺浪欲奪思洪發貢章地。設詞請於朝。子俊言不宜許。乃諭止之。貴州巡撫陳儼等言。播州苗竊發。請調湖廣廣西四川兵五萬。合貴州兵會剿。子俊言賊在四川。而貴州請討。是邀功也。奏寢其事。初子俊論陳鉞掩殺貢夷罪。帝以汪直故宥之。鉞多方構子俊於直。子俊自危。會母憂歸。乃得免。子俊之

築邊牆也。或疑沙土易傾。寇至未可恃。至十八年。寇入犯。許寧等逐之。寇扼於牆。斬散漫不得出。遂大衄。邊人益思子俊功。服闋拜戶部尚書。尋加太子太保。二十年。命兼左副都御史。總督大同宣府軍務。其冬還朝。明年正月星變。陳時弊八事。帝多采納。未幾復出行邊。子俊巡歷宣大時。請以延綏邊牆法行之。兩鎮因歲歉而止。比復出銳欲行之。言東起四海。治西抵黃河。延袤千三百餘里。舊有墩百七十。應增築四百四十墩。高廣皆二丈。計役夫八萬六千。數月可成。詔明年四月卽工。然是時歲比不登。公私耗敝。驟興大役。上下難之。子俊又欲責成於邊臣。而已不親其事。謗議由是起。至冬疏請還京。帝入蜚語。命改左都御史。巡撫大同。中官韋敬讒子俊

假修邊多侵耗。帝命工部侍郎杜謙等勘之。敬又劾子俊私恩怨易將帥。帝下兵部覈侍郎阮勤等爲白。帝怒讓勤等。命謙并按問。而給事御史復交章劾。中朝多欲傾子俊。子俊危甚。賴謙等平情按之。還奏易置將帥。如勤等言。所費無私。然爲銀百五十萬。米菽二百三十萬。耗財煩民。不得無罪。遂落太子太保致仕去。時二十二年二月也。明年正月。兵部缺尚書。帝悟子俊無罪。復召任之。仍加太子太保。孝宗嗣位。以先朝老臣待之彌厚。弘治元年。疏陳四事。已又上邊防七事。帝多允行。后父張巒封壽寧伯。子俊以封爵太驟。疏爭之。報聞。明年疾亟。猶手削奏稿。陳救荒弭盜之策。甫得請而卒。年六十一。贈太保。諡肅敏。子俊沈毅寡言。有偉略。凡奏疏公移。必

自屬草。每夜分方寢。嘗曰。大臣謀國。當身任利害。豈得遠怨而恩爲自全計。故榆林始事。怨讟叢起。子俊持之愈堅。竟以成功。爲數世利。性孝友。居母憂時。令子寘母會試。曰。雖無律令。吾心不忍也。當廕子。移以廕弟。子寘舉進士。終戶部員外郎。寘就武廕爲錦衣千戶。終指揮同知。曾孫承勛承業。皆進士。承勛翰林修撰。承業雲南僉事。

阮勤。本交趾人。其父內徙。占籍長子。勤舉景泰中進士。歷台州知府。清慎有惠政。賜誥旌異。以右副都御史。巡撫陝西。築墩臺十四所。治垣塹三十餘里。歲饑。奏免七府租。四十餘萬石。入爲侍郎。調南京刑部。蠻邦人著聲中國者。勤爲最。徐廷璋。字公器。羅山人。性豪邁。有才略。景泰初。舉進士。授工

科給事中。四年上言。師保之官。非賢不授。今每部增尚書一人。都察院增副僉都御史三十餘人。且徧加官銜。名器猥濫。蠻方屢貢金銀寶石火雞白鹿之屬。未足爲珍。徒擾道路。請一切停罷。河南山東湖廣浙江皆內地。可省巡撫官。其撫邊方者。不宜久任。致法玩不行。尚書何文淵既罷。其黨許資王。魏汪廷訓何澄輩。亦宜斥逐。凡論七事。帝嘉之。下所司議。遂省四巡撫。天順中。歷兵科都給事中。憲宗嗣位。門達有罪。廷臣會鞫。猶畏不敢言。廷璋叱加刑。達乃伏辜。尋超擢右僉都御史。巡撫延綏。劾總兵官張傑貪淫。傑亦疏訐廷璋。詔勘。傑犯有迹。廷璋事多虛。俱逮問。廷訊如勘者言。乃謫傑戍邊。廷璋停一歲俸。尋以盧祥代。而廷璋撫甘肅。數條上邊務。且請

設肅州學校。諸山丹涼州莊浪西寧已建學者。諸生得食廩。充貢如中土。帝多從之。在鎮七年。武備振飭。調撫寧夏。大築邊牆。塹山堙谷。亘數百里。時余子俊撫延綏。馬文升撫陝西。廷璋名與埒。稱關中三巡撫。坐事罷歸。久之卒。

朱英字時傑。桂陽人。五歲而孤。力學。舉正統十年進士。授御史。浙閩盜起。簡御史十二人。與中官分守諸府。英守處州。而葉宗留黨四出剽掠。處州道梗。英間道馳至。撫降甚衆。戮賊首周明松等。賊散去。乃還。景泰初。偕給事中林聰等。劾汪泉。善增。詳見聰傳。御史王豪。嘗以勘陳循爭地事。忤循爲所訐。至是循草詔言。風憲官被訐者。雖經赦宥。悉與外除。於是豪當改知縣。英言。若如詔書。則凡遭御史抨擊之人。皆將挾讐。

誣訐。而御史愈緘默不言矣。章下法司。請如英言。乃復豪職。未幾出爲廣東右參議。過家省母。橐中惟賜金十兩。抵任撫凋瘵流亾。立均徭法。十歲一更。民稱便。天順初。兩廣賊愈熾。諸將多濫殺冒功。巡撫葉盛屬英督察。參將范信誣宋泰永平二鄉民爲賊。屠戮殆盡。又欲屠進城鄉。英馳訊。悉縱去。信忿留師不還。英密請於盛。檄信班師。一方始靖。潮州賊羅劉寧等流劫遠近。屢挫官軍。英會師破滅之。還所掠人口數千。別置一營。以處婦女。人莫敢犯。官參議十年。進右參政。遭母憂。成化初。服闋補陝西大軍討滿四。英主饋餉有功。歷福建陝西左右布政使。皆推行均徭法。十年。以右副都御史巡撫甘肅。先後陳安邊二十八事。其請徙居戎安流離。簡貢使。於

時務尤切。明年冬。兩廣總督吳琛卒。廷議以英前在廣東有威信。遂以代琛。自韓雍大征以來。將帥喜邀功利。俘掠名爲鵬勦。英至鎮。以寧靜約飭將士。毋得張賊聲勢。妄請用師。招撫猺獍效順者。定爲編戶。給復三年。於是馬平陽朔蒼梧諸縣蠻悉聞風來歸。而荔波賊李公主有衆數萬。久負固。亦遣子納款。爲置永安州處之。俾其子孫世吏。自是歸附日衆。凡爲戶四萬三千有奇。口十五萬有奇。帝甚嘉之。廣西鎮守中官黃沁奪靖江王府草場。英偕總鎮中官顧恆等覆覈。坐沁罪。總府坐次。恆居中。英居左。總兵官陳政居右。旣而政以伯爵欲抑英居右。英不可。恆奏乞裁定。兵部尚書余子俊等請如舊。帝不許。命解英總督。止爲巡撫。居政下。子俊言。英招

徠功多。當增秩褒賞。乃反削其事權。恐無以鎮諸蠻。乃擢英右都御史。仍總督位次如故。田州酋黃明。烝其知府岑溥。祖母欲殺溥。溥出走。思恩。明因肆屠戮。英將進討。而檄溥族人恩城知州欽。令殺明雪耻。欽遂誅明并其族屬。傳首軍門。英淳厚。然持法無所假借。與市舶中官韋眷忤。眷遂撫奏英專權玩賊。溥州知府史芳。以事見責。亦訐英奸貪欺罔。按皆無驗。乃鑄芳二官。諭眷協和共事。十六年。交趾攻老撾。議者恐其內寇。詔問英處置之宜。對言。彼不過爭甌脫耳。諭之當自悔懼。帝從其言。果上表謝。溥梧高廉賊起。偕政等分道擊之。再戰。俘斬甚衆。十九年。桂林平樂蠻攻城殺將。英政復分兵十二道擊破之。明年。入掌都察院事。尋加太子少保。又明年。

正月星變。疏陳八事。請禁邊將節旦獻馬。鎮守中官武將。不得私立莊田。侵奪官地。燒丹符咒。左道之人。當置重典。四方分守監槍內官。勿進貢品物。罷撤倉場馬房。上林苑增設內侍。召還建言得罪諸臣。清內府收白糧積弊。治奸民投獻莊田。及貴戚受獻者罪。皆不便於權倖者。執政多持之不行。英造內閣。力伸前說。竟不能盡從也。時流民集京師者多。英請人給米月三斗。幼者半之。報許。其年秋卒。贈太子太保。英爲總督。承韓雍吳琛後。雍雖有大功。恢廓自奉。贈遺過侈。有司困供億。公私耗竭。而琛務謹廉。至英益持清節。僅攜一蒼頭之官。先後屢賜璽書及金幣。英藏璽書。貯金幣於庫。其威望不及雍。而惠澤過之。在甘肅積軍儲三十萬。兩廣四十餘萬。

皆不以聞。或問之。荅曰。此邊臣常分。何足言。正德中。追謚恭簡。子守。字進士。刑部郎中。

秦紘。字世纓。單人。景泰初進士。授南京御史。劾治內官傅鎮兒罪。諫止江南采翠毛魚魷等使。權貴忌之。蜚語聞。會考察御史。都御史軒輓坐紘擅受民訟。謫湖廣驛丞。天順初。以薦遷雄縣知縣。奉御杜堅捕天鷲。從人暴橫。紘執杖之。坐下詔獄。民五千詣闕訟。乃調知府谷。遷葭州知州。調秦州。母喪去官。州人乞借紘服闋。還故任。尋擢鞏昌知府。改西安。遷陝西右參政。岷州番亂。提兵三千破之。進俸一級。成化十三年。擢右僉都御史。巡撫山西。奏鎮國將軍奇澗等罪。奇澗父慶成。王鍾鎰爲奏辯。且誣紘。帝重違王意。逮紘下法司治。事皆無

驗。於是奪奇澗等三人爵。王亦削祿三之一。而改紘撫河南。尋復調宣府。小王子數萬騎寇大同。敗總兵官許寧。長驅入順聖川。掠宣府境。紘與總兵官周玉等邀擊遁去。尋入掠興寧口。連戰却之。追還所掠。璽書勞焉。進左僉都御史。巡撫如故。奏革鎮守內臣舍人。召爲戶部右侍郎。萬安逐尹旻。誣紘旻黨。降廣西右參政。進福建左布政使。總制兩廣軍務。奏言中官武將。總鎮兩廣者。率縱私人擾商賈。高居私家。擅理公事。賊殺不辜。交通土官。爲奸利。而天下鎮守官。皆得擅執軍職。受民訟。非制。請嚴禁絕。總鎮府。故有賞功所。歲儲金錢數萬。費出無經。宜從都御史勾稽。廣潮南韶多盜。當設社學。編保甲。教誨而要束之。俾絕盜源。帝悉從其請。恩城知州岑欽。

攻逐田州知府岑溥。與泗城知州岑應分據其地。紘入田州。逐走欽。還溥於府。留官軍戍之。亂遂定。遣將討黎賊陵水獠賊德慶皆平。紘之初涖鎮也。劾總兵官安遠侯柳景貪暴。逮下獄。景乃許紘。勘無左證。法司當景死。景連姻周太后。家有奧援。許紘不已。詔并逮紘。廷鞫。卒無罪。詔宥景死。奪爵閒住。而紘亦罷歸。大臣王恕等請留紘不納。既歸。廷臣復連章言。紘可大用。居數月。起南京戶部尚書。引疾去。十四年秋。寇大入花馬池。敗官軍孔壩溝。直抵平涼。言者謂紘有威名。雖老可用。詔起戶部尚書。兼右副都御史。總制三邊軍務。紘馳至固原。按行敗所。躬祭陣亡將士。掩其骼。奏錄死事指揮朱鼎等五人恤軍士戰歿者家。劾治敗將楊琳等四人罪。更易守

將練壯士。興屯田。申明號令。軍聲大振。初寇未入河套。平原固原皆內地無患。自孛來住牧後。固原當兵衝。為平慶臨鞏門戶。而城隘民貧。兵力單弱。商販不至。紘乃拓治城郭。招徠商賈。建改為州。而身留節制之。奏言固原主客兵。止萬八千人。散守城堡二十四。勢分力弱。宜益兵。舊臨鞏秦州諸軍。歲赴甘涼備禦。及他方有警。又調兵甘涼。或發京軍征討。夫京師天下本。邊將手握重兵。而一遇有事。輒請京軍。非強幹弱枝之道也。請自今京兵毋輕發。臨鞏甘涼諸軍亦宜各還本鎮。但選知兵宿將一二人。各守其地。人以戍為家。軍以將為命。自樂趨役而有戰心。計之得者也。紘見固原迤北延袤千里。閒田數十萬頃。曠野近邊。無城堡可依。議於花馬池迤西。

至小鹽池二百里。每二十里築一堡。堡周四十八丈。役軍五百人。固原迤北諸處亦各築屯堡。募人屯種。每頃稅米五石。歲可得五十萬石。規畫已定。而寧夏巡撫劉憲爲梗。絃乃奏曰。竊見三邊情形。延綏甘涼地雖廣。而士馬精強。寧夏怯弱矣。然河山險阻。惟花馬池至固原。軍旣怯弱。又墩臺疏遠。敵騎得長驅深入。故當增築墩堡。韋州豫望城諸處亦然。今固原迤南。修築將畢。惟花馬池迤北二百里。當築十堡。而憲危言阻衆。且廢垂成之功。乞令憲制三邊。而改臣撫寧夏。俾得終邊防。於事爲便。帝下詔責憲。憲引罪。卒行絃策。修築諸邊城堡一萬四千餘所。垣塹六千四百餘里。固原屹爲重鎮。絃又以意作戰車。名全勝車。詔頒其式於諸邊。在事三年。四鎮

晏然。前後經略西陲者莫及。十七年。召還視部事。以年老連章力辭。乞致仕。詔賜敕乘傳歸。月廩歲隸如制。明年卒。年八十。贈少保。諡襄毅。絃廉介絕俗。妻孥菜羹麥飯。常不飽。性剛果勇於除害。不自顧慮。士大夫識與不識。稱爲偉人。在兩廣被逮時。方議討後山賊。治軍事畢。從容就道。儀衛騶從不貶損。旣踰嶺。始囚服。就繫。謂官校曰。兩廣蠻夷雜處。總制體尊。遽就拘執。損國威。今旣踰嶺。真囚矣。其嚴重得體如此。劉瑾亂政。絃家奴憾絃。婦弟楊瑾。以絃所遺火礮。投緝事校尉。誣瑾畜違禁軍器。劉瑾怒。歸罪於絃。籍其家無所得。言官張九敘涂敬等。復希旨劾絃。士類嗤之。

明史藁

列傳第五十六終

明史藁

列傳第五十七

光祿大夫 經筵講官明史總裁戶部尚書加七級臣王鴻緒奉
敕編撰

羅倫涂 棐

莊景

黃仲昭

章懋從子拯

鄒智

舒芬崔 桐

鄒守益子善 善從子德泳 善子德涵

德溥 羅洪先

羅倫字彝正吉安永豐人五歲嘗隨母入園果落衆競取倫獨賜而後受家貧樵牧挾書誦不輟年十四即授徒以資親養及爲諸生志聖賢學嘗曰舉業非能壞人人自壞之耳知府張瑄憫其貧周之粟謝不受居父母喪踰大祥始食鹽酪成化二年廷試答策萬餘言直斥時弊名震都下擢進士第

一。授翰林修撰。踰二月。大學士李賢奔喪畢。奉詔還朝。倫詰賢沮之不聽。乃上疏曰。臣聞朝廷援楊溥故事。起復李賢。竊謂賢大臣。起復大事。綱常風化繫焉。不可不慎。曩陛下制策有曰。朕夙夜拳拳。欲正大綱。舉萬目。使人倫明於上。風俗厚於下。竊謂明人倫厚風俗。莫先於孝。國非此無以爲國家。非此無以爲家人。非此則禽獸而已矣。在禮子有父母之喪。君三年不呼其門。子夏問三年之喪。金革無避禮。與孔子曰。魯公伯禽有爲爲之也。今以三年之喪。從其利者。吾弗知也。陛下於賢。以金革之事起復之。與則未之有也。以大臣起復之。與則禮所未見也。夫爲人君。當舉先王之禮教其臣。爲人臣。當守先王之禮事其君。昔宋仁宗嘗起復富弼矣。弼辭曰。不

敢遵故事。以遂前代之非。但當據禮經以行。今日之是。仁宗卒從其請。孝宗嘗起復劉珙矣。珙辭曰。身在草土之中。國無門庭之寇。難冒金革之名。私竊利祿之實。孝宗不抑其情。此二君者。未嘗以故事強其臣。二臣者。未嘗以故事徇其君。故史冊書之爲盛事。士大夫傳之爲美談。無他。君能教臣以孝。臣有孝可移於君也。自是而後。無復禮義。王黼史嵩之陳宜中賈似道之徒。皆援故事起復。然天下壞亂。社稷傾危。流禍當時。遺臭後代。無他。君不教臣以孝。臣無孝可移於君也。陛下必欲賢身任天下之事。則賢身不可留。口實可言。宜降溫詔。俾如劉珙。得以言事。使賢於天下之事。知必言。言必盡。陛下於賢之言。聞必行。行必力。賢雖不起復。猶起復也。苟知之

而不能盡言。言之而不能力行。賢雖起復。以益也。且陛下無謂廟堂無賢臣。庶官無賢士。君孟也。臣水也。水之方圓。孟實主之。臣之直佞。君實名之。陛下誠於退朝之暇。親直諒博洽之臣。講聖學君德之要。詢政事得失。察民生利病。訪人才賢否。考古今盛衰。舍獨信之偏見。納逆耳之苦言。則衆賢羣策。畢萃於朝。又何待違先王之禮經。損大臣之名節。然後天下可治哉。夫賢之起復。猶可諉曰。負天下之重也。比年以來。朝廷以奪情爲常典。搢紳以起復爲美名。食稻衣錦之徒。跡踵廟堂。不知此人於天下之重何關耶。且婦於舅姑。喪亦三年。孫於祖父母。服則齊衰。奪情於夫。初無預其妻。奪情於父。初無干其子。今或舍館如故。妻孥不還。乃號於天下曰。本欲終

喪。朝命不許。雖三尺童子。臣知其不信也。爲人父者。所以望其子之報。豈擬至於此哉。爲人子者。所以報其親之心。豈忍至於此哉。枉已者不能直人。忘親者不能忠君。陛下何取於若人。而起復之也。今大臣起復。羣臣不以爲非。且從而贊之。羣臣起復。大臣不以爲非。且從而成之。上下成俗。混然同流。率天下之人。爲無父之歸。臣不忍聖明之朝。致綱常之壞。風俗之弊。一至此極也。願陛下斷自聖衷。許賢歸家持服。其他已起復者。仍令奔喪。未起復者。悉許終制。脫有金革之變。亦從墨衰之權。使任軍事於外。盡心喪於內。將朝廷端則天下。一。大臣法則羣臣效。人倫由是明。風俗由是厚矣。疏入。謫福建市舶司副提舉。御史陳選。疏救不報。御史楊琅。復申救。帝

切責之。尚書王翱以文彥博救唐介事諷賢。賢曰。潞公市恩歸怨朝廷。吾不可以效之。竟不能用。亾何賢卒。明年以學士商輅言。名復原職。改南京。居二年。引疾歸。遂不復出。當倫爲提舉時。御史豐城涂棐。巡按福建。司禮中官黃賜。延平人也。請見棐。不可。銜之。比還發泉州知府李宗學受賕狀。宗學許棐。賜從中主其奏。兩人俱被徵。詞連倫。當并逮。詔獄。鎮撫司某曰。羅先生可至此乎。卽日鞫成上之。倫得免。棐亦復官。倫爲人剛正。嚴於律也。義所在毅然必爲。於富貴名利泊如也。里居倡行鄉約。相率無敢犯。衣食粗惡。或遺之衣。見道殮解以覆之。晨留客飲。妻子貸粟隣家。及午方炊。不爲意。以金牛山。人跡不至。築室著書其中。四方從學者甚衆。十四年卒。年

四十八。嘉靖初。從御史唐龍請。追贈左春坊諭德。諡文毅。學者稱一峯先生。棐。天順四年進士。成化中。嘗言祖宗朝政事必與大臣面議。自先帝幼冲。未能裁決。柄國者慮其缺遺。假簡易之辭。以便宣布。凡視朝奏事。諭旨。輒曰。所司知之。此一時權宜。非可循爲定制。況批答多參以中官。內閣或不與。尤乖祖制。乞復面議。杜蔽壅之弊。憲宗不能用。終廣東副使。莊泉字孔暘。江浦人。自幼豪邁不羣。嗜古博學。舉成化二年進士。改庶吉士。授翰林檢討。與編修章懋。黃仲昭。疏諫內廷。張燈。忤旨。廷杖二十。謫桂陽州判官。修撰羅倫。先以言事被黜。時稱翰林四諫。尋以給事中毛弘。御史陳壯等論救。改南京行人司副。居三年。以母憂去。繼丁父憂。哀毀。喪除不復出。

卜居定山二十餘年。學者稱定山先生。巡撫王恕嘗欲葺其廬。辭之。景生平不尚著述。有自得輒見之於詩。薦章十餘上。部檄屢趣。俱不赴。大學士丘濬素惡景。語人曰。率天下士背朝廷者景也。弘治七年。有薦景者。奉詔起用。景念濬當國不出。且得罪。強起入都。大學士徐溥語郎中邵寶曰。定山故翰林。復之。濬聞曰。我不識。所謂定山也。乃復以爲行人司副。俄遷南京吏部郎中。得風疾。明年乞身歸。部臣不爲奏。又明年京察。尚書倪岳以老疾罷之。居二年卒。年六十三。天啟初。追諡文節。

黃仲昭名潛。以字行。莆田人。性端謹。年十五六。卽有志正學。登成化二年進士。改庶吉士。授編修。與章懋莊景同以直諫

被杖。謫湘潭知縣。在道用諫官言。改南京大理評事。兩京諸司隸卒率放還。而取其月錢爲故事。惟仲昭與羅倫不取。御史縱子弟取賂。刑部曲爲地。仲昭駁正之。有羣掠民婦轉鬻者。部坐首惡一人。仲昭請皆坐。連遭父母喪。不離苦塊者四年。服除。以親不逮養。遂不出。弘治改元。御史姜洪疏薦。吏部尚書王恕檄有司敦趣。比至。恕逐之大門外。揖讓升堂。相向再拜。世兩高之。除江西提學僉事。誨士以正學。久之。再疏乞休。日事著述。學者稱未軒先生。卒年七十四。仲昭祖壽生。翰林檢討。有學行。父嘉。東鹿知縣。多善政。兄深。御史。深子乾亨。行人。使滿刺加。歿於海。乾亨子如金。廣西提學副使。希雍。蘓州同知。仲昭孫懋。官南京戶部侍郎。同邑宋端儀。字孔時。成

化十七年進士。官禮部主事。雲南缺提學官。部議屬端儀。爲吏洩。端儀曰。啟事未登。已喧衆口。人其謂我干乞乎。力辭之。已進主客員外郎。貢使以贄見。悉却不納。初在國學。爲祭酒。丘濬所知。及濬柄政。未嘗一造其門。廣東提學缺。部以端儀名上。濬竟阻之。濬卒。始以按察僉事。督廣東學校。卒官。端儀慨建文朝忠臣湮沒。乃搜輯遺事。爲革除錄。建文忠臣之有錄。自端儀始也。與仲昭善。其卒也。仲昭銘其墓。

章懋字德懋。蘭谿人。成化二年。會試第一。成進士。改庶吉士。明年冬。授編修。憲宗將以元夕張燈。命詞臣撰詩詞進奉。懋與同官黃仲昭。檢討莊景。疏諫曰。頃諭臣等。撰鰲山煙火詩詞。臣等竊議。此必非陛下本懷。或以兩宮聖母在上。欲備極

孝養。奉其歡心耳。然大孝在乎養志。不可徒陳耳目之玩。以爲養也。今川廣未靖。遼左多虞。江西湖廣。赤地數千里。萬姓嗷嗷。張口待哺。此正陛下宵旰焦勞。兩宮母后。同憂天下之日。至翰林官。以論思爲職。鄙俚之言。豈宜進於君上。伏讀宣宗皇帝御製翰林箴。有曰。啓沃之言。唯義與仁。堯舜之道。鄒魯以陳。張燈豈堯舜之道。詩詞豈仁義之言。若謂煙火細故。不足爲聖德累。則舜何必不造漆器。禹何必不嗜旨酒。漢文何必不作露臺。古帝王慎小謹微。必矜細行者。正以欲不可縱。漸不可長也。伏乞將煙火停止。移此視聽。以明日達聰。省此貲財。以賑饑恤困。則災祲可銷。太平可致。帝以元夕張燈。祖宗故事。惡懋等妄言。乃杖之闕下。左遷其官。懋得臨武知

縣未行。以給事中毛弘論救。改南京大理左評事。踰三年遷福建僉事。平泰寧沙尤賊。聽福安民採礦。以杜盜源。建議番貨互通貿易。以裕商民。政績甚著。滿考入都。年止四十一。力求致仕。吏部尚書尹旻固留之不可。既歸。屏跡不入城府。奉親之暇。專以讀書講學爲事。弟子執經者。日益進。貧無供具。惟脫粟菜羹而已。四方學士大夫高其風。稱爲楓山先生。家居二十餘年。中外交薦。部檄屢起之。以親老堅不赴。弘治中。孝宗登用羣賢。衆議兩京國學。當用名儒。起謝鐸於北監。及南監缺祭酒。遂以懋補之。懋方遭父憂。不就。時南監缺司業。且二十年。詔特以羅欽順爲之。而虛位以待懋。十六年服闋。懋復固辭不允。始涖任。六館士翕然向風。人人自以爲得師。

監生尤樾母病。例不得歸省。晝夜泣。懋遣之歸。曰。吾寧以違制獲罪。武宗立。陳勤聖學。隆繼述。謹大婚。重詔令。敬天戒。五事。俄引年乞休。不俟命而歸。既命下。不許。疏累上。始得請。正德五年。起南京太常卿。明年。召爲禮部右侍郎。皆力辭不就。言者屢陳懋德望。請加優禮。詔有司歲時存問。世宗嗣位。卽家進南京禮部尚書致仕。其冬遣行人存問。而懋已卒。年八十六。贈太子少保。諡文懿。懋爲學恪守先儒訓。或諷爲文章。曰小技耳。予弗暇。有勸以著述者。曰先儒之言至矣。及其繁可也。通籍五十餘年。歷俸僅滿三考。難進易退之節。世尤高之。生三子。兼令業農。縣令過之。諸子釋耒跪迎。人不知其貴公子也。子嘗省懋於南監。徒步往道。被巡檢笞。已知而請罪。

懋慰遣之。晚年三子一孫盡死。年八十二。生少子接。後廕爲國子生。從子拯字以道。幼從懋學。登進士。爲刑部主事。忤劉瑾。下詔獄。謫梧州府通判。瑾誅。擢南京兵部郎中。嘉靖中。累官工部尚書。桂萼欲復海運。延公卿議得失。拯曰。海運雖有故事。而風濤百倍於河。且天津海口多淤。自古不聞有濬海者。議遂寢。南北郊議起。拯言不可。失帝意。尋坐郊壇祭器缺。供落職歸。久之復官。致仕卒。

鄒智字汝愚。合州人。年十二能文。家貧讀書。焚木葉繼晷。如是三年。成化二十二年。舉鄉試第一。時帝益倦於政。而萬安劉吉尹直居政府。智憤之。道出三原。往見致仕尚書王恕。慨然曰。治天下在進君子退小人。方今小人在位。毒痛四海。而

公顧屏棄田里。智此行非爲科名。欲上書天子。別白賢奸。拯斯民於塗炭耳。恕竒其言。笑而不荅。明年登進士。改庶吉士。遂上疏曰。陛下於輔臣遇事必咨。殊恩異數必及。亦云任矣。然或進退一人。處分一事。往往降中旨。使一二小人。陰執其柄。是旣任之。而又疑之也。陛下豈不欲推誠待物哉。由其進身之初。多出私門。先有以致陛下之厭薄。及與議事。又唯諾惟謹。心心倪倪。若有所不敢。反不如一二俗吏。足以任事。此陛下所爲疑也。臣竊以爲過矣。昔宋仁宗知夏竦懷詐。則黜之。知呂夷簡能改過。則容之。知杜衍韓琦范仲淹富弼可任。則不次擢之。故能北拒契丹。西臣元昊。未聞一任一疑。可以成天下事也。願陛下察孰爲竦。孰爲夷簡。而黜之容之。孰爲

衍琦仲淹弼而擢之。日與講論治道。不使小人得參其間。則天工亮矣。臣又聞天下事惟輔臣得議。惟諫官得言。諫官雖卑。與輔臣等。乃今之諫官。以軀體魁梧爲美。以應對捷給爲賢。以簿書刑獄爲職業。不畏天變。不恤人窮。或以忠義激之。則曰。吾非不欲言。言出則禍隨。其誰吾聽。嗚呼。旣不能盡言效職。而復引過以歸於上。有人心者。固如是乎。臣願罷黜浮冗。廣求風節之臣。令仗下糾彈。入閣參議。或請對。或輪對。或非時召對。霽色接之。溫言導之。使得畢誠盡蘊。則天聽開矣。臣又聞汲黯在朝。淮南寢謀。君子之有益人國也大矣。以陛下之聰明。寧不知君子可任。而故屈抑之哉。乃小人巧讒間。以中傷之耳。今碩德如王恕。忠鯁如強珍。亮直剛方如章懋。

林俊張吉。皆一時人望。不宜貶錮。負上天生才之意。陛下誠召此數人。置要近之地。使各盡其平生。則天心協矣。臣又聞高皇帝制。閣寺惟給掃除。不及以政。近者舊章日壞。邪徑日開。人主大權。盡出其手。內倚之爲相。外倚之爲將。藩方倚之爲鎮撫。伶人賤工倚之。以作奇技淫巧。法王佛子倚之。以恣出入宮禁。此豈高皇帝所許哉。願陛下以宰相爲股肱。以諫官爲耳目。以正人君子爲腹心。深思極慮。定宗社長久之計。則大綱正矣。然其本則在陛下明理何如耳。竊聞侍臣進講。無反覆論辯之功。陛下聽講。亦無從容沃心之益。如此而欲明理以應事。臣不信也。願陛下念義理之難窮。惜日月之易邁。考之經史。驗之身心。使終歲無間。則聖學明。而萬事畢治。

豈特四事之舉措得其當已耶。疏入不報。智既慷慨負奇。其時御史湯鼎。中書舍人吉人。進士李文祥。亦竝負意氣。智皆與之善。因相與品覈公卿。裁量人物。互相品藻。未幾孝宗嗣位。弊政多所更。智喜以爲其志且得行。乃復因星變。上書曰。伏讀明詔云。天下利弊。所當興革。所在官員人等。條具以聞。此殆陛下知前日登極詔書。爲奸臣所誤。禁言官。毋風聞挾私言事。物論囂然。故復下此條。自解耳。夫不曰朕躬有過。朝政有闕。而曰利弊當興革。不曰許諸人直言無隱。而曰官員人等。條具以聞。陛下所以求言者。已不廣矣。今欲興天下之利。革天下之弊。當求利弊之本原。而興且革之。不當毛舉細故。以爲利弊在是也。本原何在。閣臣是已。少師安。持祿怙寵。

少保吉。附下周上。太子少保直。挾詐懷奸。世之小人也。陛下留之。則君德必不就。朝政必不修。此弊所當革者也。致仕尚書王恕。忠亮可任大事。尚書王竑。剛毅可寢大奸。都御史彭韶。方正可決大疑。世之君子也。陛下用之。則君德開明。朝政清肅。此利所當興也。然君子所以不進。小人所以不退。大抵由宦官權重而已。漢元帝嘗任蕭望之。周堪矣。卒制于弘恭。石顯。宋孝宗嘗任劉俊卿。劉珙矣。卒間於陳源。甘昇。李林甫。牛仙客。與高力士相附和。而唐政不綱。賈似道。丁大全。與董宋臣相表裏。而宋室不振。君子小人進退之機。未嘗不繫此曹之盛衰。願陛下鑒既往。謹將來。攬天綱。張英斷。凡所以待宦官者。一以高皇帝爲法。則君子可進。小人可退。而天下之

治出於一矣。以陛下聰明冠世，豈不知刑臣不可委信，然而不免誤用者，殆正心之學未講也。心發於天理，則耳目聰明，言動中節，何宦官之能惑發於人欲，則一身無主，萬事失綱，投間抵隙，蒙蔽得施，雖有神武之資，亦將日改月化，而寢失其初。欲進君子，退小人，與天下之利，革天下之弊，豈可得哉。帝得疏，領之，居無何，安直遂相繼罷斥，而吉任寄如故。銜智刺骨，時飛常朝當侍班，智告之曰：祖宗盛時，御史侍班，得面陳政務得失，立取進止，自後惟退而具疏，此君臣情意所由隔也。君幸值維新之日，蓋倣先朝故事行之，機不可失。及恕赴召至京，智往謁曰：後世人臣，不獲時見天子，故事多苟且，願公且勿受官，先請朝見，取時政不善者，歷陳之力，請除革。

而後拜命，庶其有濟。若先受官，無復見天子之日矣。龜與恕亦未能用其言。會劉燾獄起，吉使其黨魏璋入智名，遂下詔獄，智身親三木，僅屬喘息，慷慨對簿曰：智見經筵，以寒暑輟講，午朝以細事塞責，紀綱廢弛，風俗浮薄，生民憔悴，邊備空虛，私竊以為憂。與龜等往來論議，誠有之，不知其他讞者承吉意，竟謫廣東石城所吏目。總督秦紘檄召修書，乃居會城，聞陳獻章講道新會，往受業。自是學益粹，其父來視，怒其不以祿養，筮之。智泣而受責。弘治四年十月，得疾遽卒。年二十有六。同年生吳廷舉，為順德知縣，歿而歸其喪。天啓初，追諡忠介。

舒芬字國裳，進賢人。年十二獻駟雁賦於知府祝瀚，遂知名。

正德十二年。舉進士第一。授修撰。時武宗數微行。畋遊無度。其明年。孝貞皇后崩。甫踰月。欲幸宣府。託言往視山陵。罷沿道兵衛。芬上言。陛下三年之內。當深居不出。雖釋服之後。固儼然焚疚也。且自古萬乘之重。非奔竄逃匿。未有不嚴侍衛者。又等威莫大於車服。以天子之尊。下同庶人。舍大輅衮冕。而羸車褻服。是御。非所以辨上下定禮義。不聽。孝貞山陵畢。迎主祔廟。自長安門入。芬又言。孝貞皇后作配茂陵。未聞失德。祖宗之制。旣葬迎主。必入正門。昨孝貞之主。顧從陛下駕由旁門入。他日史臣書之曰。六月己丑。車駕至自山陵。迎孝貞純皇后主。入長安門。將使孝貞有不得正終之嫌。其何以解於天下後世。昨祔廟之夕。疾風迅雷甚雨。意者聖祖列宗。

及孝貞皇后之靈。傲告陛下也。陛下宜卽明詔中外。以示改過不報。遂乞歸養。不許。又明年三月。帝議南巡。時寧王宸濠久蓄異謀。與近倖相結。人情惶懼。言官伏闕諫。忤旨被責讓。芬憂之。與吏部員外郎夏良勝。禮部主事萬潮。庶吉士汪應軫。要諸曹連章入諫。衆許諾。芬遂偕編修崔桐。庶吉士江暉。王廷陳。馬汝驥。曹嘉及應軫。上疏曰。古帝王所以巡狩者。協律度。同量衡。訪遺老。問疾苦。黜陟幽明。式序在位。是以諸侯畏焉。百姓安焉。若陛下之出。不過如秦皇漢武。侈心爲樂而已。非能行巡狩之禮者也。博浪柏谷。其禍亦可鑒矣。近者西北再巡。六師不攝。四民告病。哀痛之聲。上徹蒼昊。傳播四方。人心震動。故一聞南巡詔書。皆鳥驚獸散。而有司方以迎奉。

爲名。徵發嚴急。江淮之間。蕭然煩費。萬一不逞之徒。乘勢倡亂。爲禍非細。且陛下以鎮國公自命。苟至親王國境。或據勛臣之禮。以待陛下。將北嚮朝之乎。抑南面受其朝乎。假令循名責實。深求悖謬之端。則左右寵倖無死所矣。尚有事堪痛哭。不忍言者。宗藩蓄劉濞之釁。大臣懷馮道之心。以祿位爲故物。以朝署爲市廛。以陛下爲奕棋。以革除年間爲故事。特左右寵倖。知術短淺。無能以此言告陛下耳。使陛下得聞此言。雖禁門之外。亦將警蹕而出。尚敢輕騎慢遊哉。疏入。陸完迎謂曰。上聞有諫者。輒恚。欲自引決。諸君且休。勿歸過君上。沾直名。芬等不應而出。有頃。良勝潮過。芬扼腕恨完。芬因邀博士陳九川至。酌之酒曰。匹夫不可奪志。君輩可遂已乎。其

夕三人共宿。芬所議定。遂偕諸曹連疏入。帝大怒。命跪闕下。五日期滿。復杖之三十。芬創甚。幾斃。昇至翰林院中。掌院者懼得罪。命標出之。芬曰。吾官此。卽死此耳。竟謫福建市舶副提舉。裹創就道。世宗卽位。名復故官。嘉靖三年春。昭聖太后壽旦。詔免諸命婦朝賀。芬言。前者興國太后令旦。命婦朝賀如儀。今遇皇太后壽節。忽行傳免。恐失輕重之宜。乞收成命。以彰聖孝。帝怒奪俸三月。時帝欲尊崇本生。芬偕其僚連章極諫。及張璁桂萼方獻夫驟擢學士。芬及同官楊維聰編修王思羞與同列。拜疏乞罷。未幾復偕同官楊慎等伏左順門哭爭。帝怒下獄。廷杖奪俸如初。旋遭母喪。歸卒於家。年四十四。世稱忠孝狀元。芬丰神玉立。負氣峻厲。端居竟日無倦容。

夜則計過自訟。以倡明絕學爲己任。其學貫串諸經。兼通天文律曆。而尤精於周禮。嘗曰。周禮視儀禮禮記。猶蜀之視吳魏也。賈氏謂儀禮爲本。周禮爲末矣。朱子不加是正。何也。疾革。其子請所言。惟以未及表章周禮爲恨。學者稱梓溪先生。萬曆中。追諡文節。先是修撰羅倫。以諫謫福建提舉。踰十年。而芬繼之。與倫同鄉同官。所謫地與官又同。福建士大夫。遂祀芬配倫云。桐字來鳳。揚州人。鄉試第一。與芬同進士。及第。授編修。既諫南巡。竝跪闕下。受杖奪俸。嘉靖中。以待讀出爲湖廣右參議。累擢國子祭酒。禮部右侍郎。應軫等自有傳。

鄒守益字謙之。安福人。父賢字恢才。弘治九年進士。授南京大理評事。數有條奏。時頗稱之。歷官福建僉事。擒殺武平賊渠黃友勝。并誅其黨。以疾歸。居家孝友。喪祭一循禮制。守益舉正德六年會試第一。出王守仁門。以廷對第三。授翰林院編修。踰年告歸。乃謁守仁。講學於贛州。宸濠反。與守仁軍事。世宗卽位。始赴官。嘉靖三年二月。帝欲去興獻帝本生之稱。守益疏諫曰。陛下推恩本生。尊爲帝后。私親非不隆矣。復加稱皇考。去其始封之號。則視正統無別。太祖孝慈錄曰。爲人後者。爲所後父母三年。爲所後祖父母。承重。爲本生父母降期。卽喪服之隆。殺廟制祭法。皆可類推。望遵祖訓。毋爲異論所惑。疏入。忤旨被責。踰月復上疏曰。陛下欲隆本生之恩。屢下羣臣會議。羣臣據禮正言。致蒙詰讓。道路相傳。有孝長子

之稱。昔曾元以父寢疾。憚於易簣。蓋愛之至也。而曾子責之。曰姑息。魯公受天子禮樂。以祀周公。蓋尊之至也。而孔子傷之。曰周公其衰矣。臣願陛下勿以姑息事獻帝。而使後世有其衰之歎。且羣臣援經證古。欲陛下專意正統。此皆為陛下忠謀。乃不察而督過之。謂忤且慢。臣歷觀前史。如冷褒段熲。猶之徒。當時所謂忠愛。後世所斥以為邪媚也。師丹司馬光之徒。當時所謂欺慢。後世所仰以為正直也。後之視今。猶今之視古。望陛下不吝改過。察羣臣之忠愛。信而用之。名復其去國者。無使姦人動搖國是。離間宮闈。昔先帝南巡。羣臣交章諫阻。先帝赫然震怒。豈不謂欺慢可罪哉。陛下在藩邸聞之。必以是為盡忠於先帝。今入繼大統。獨不容羣臣盡忠於陛

下乎。帝大怒。下詔獄考掠。謫廣德州判官。廢淫祠。建復初書院。與學者講授其間。稍遷南京禮部郎中。州人立生祠以祀。聞守仁卒。為位哭。服心喪。日與呂柟湛若水錢德洪王畿薛侃輩論學。考滿入都。即引疾歸。久之。以薦起南京吏部郎中。名為司經局洗馬。守益以太子幼。未能出閣。乃與霍韜上聖功圖。自神堯茅茨土階。至帝西苑耕稼蠶桑。凡為圖十三。帝以為謗訕。幾得罪。賴韜受帝知。事乃解。明年春。遷太常少卿。兼侍讀學士。出掌南京翰林院。夏言欲遠之也。御史毛愷請留侍東宮。被謫。尋改南京祭酒。九廟災。守益陳上下交修之道。言殷中宗高宗反妖為祥。享國長久。帝大怒。落職歸。守益天姿純粹。守仁嘗曰。有若無。實若虛。犯而不校。謙之近之矣。

里居日事講學。四方從遊者踵至。學者稱東廓先生。家居二十餘年卒。隆慶初。贈南京禮部右侍郎。謚文莊。先是守仁主山東試。堂邑穆孔暉第一。後官侍講學士卒。贈禮部右侍郎。謚文簡。孔暉端雅好學。初不肯宗守仁說。久乃篤信之。自名王氏學。浸淫入於釋氏。而守益於戒懼慎獨。蓋兢兢焉。子善。嘉靖三十五年進士。以刑部員外郎。恤刑湖廣。矜釋甚衆。擢山東提學僉事。時與諸生講學。萬曆初。累官廣東右布政使。謝病歸。久之以薦。卽家授太常卿。致仕。子德涵。德溥。德涵字汝海。隆慶五年進士。歷刑部員外郎。張居正方禁講學。德涵守之自若。御史傅應禎。劉臺。相繼論居正。皆德涵里人。疑爲黨。出爲河南僉事。御史承風指劾。貶秩歸。善服習父訓。踐履

無怠。稱其家學。而德涵從耿定理游。定理不荅。發憤湛思。自覺有得。由是專以悟爲宗。於祖父所傳。始一變矣。德溥由萬曆十一年進士。歷司經局洗馬。早負盛名。以居錦衣千戶。霍文炳故居。發其藏金。爲東廠劾罷。善從子德泳。萬曆十四年進士。官御史。給事中。李獻可。請預教太子。斥爲民。德泳偕同官救之。亦削籍。家居三十年。言者交薦。光宗立。起尚寶少卿。歷太常卿。魏忠賢用事。遂乞休歸。所司將爲忠賢建祠。德泳塗毀其募籍。乃止。

羅洪先字達夫。吉水人。父循進士。歷兵部武選郎中。會考選武職。有指揮二十餘人。素出劉瑾門。循罷其管事。瑾怒罵尚書王敞。敞跪謝曰。郎中輩爲之。又罵曰。不能制郎中。安用尚

書。敞益懼。歸部。起易奏。循退遲之。數日而瑾敗。敞乃謝循。循歷知鎮江淮安二府。徐州兵備副使。咸有聲。洪先幼慕羅倫爲人。年十五讀王守仁傳。習錄好之。欲往受業。循不可而止。乃師事同邑李中。傳其學。嘉靖八年。舉進士第一。授修撰。卽請告歸。外舅太僕卿曾直喜曰。幸吾壻成大名。洪先曰。儒者事業。有大於此者。此三年一人。安足喜也。洪先事親孝。父每肅客。洪先冠帶行酒。拂席授几。甚恭。居二年。詔劾請告踰期者。乃赴官。尋遭父喪。苦塊蔬食。不入室者三年。繼遭母憂。亦如之。十八年。簡宮僚。召拜春坊左贊善。明年冬。與司諫唐順之。校書趙時春。疏請來歲朝正後。皇太子出御文華殿。受羣臣朝賀。時帝數稱疾不視朝。諱言儲貳臨朝事。見洪先等疏。

大怒曰。是料朕必不起也。降手詔百餘言。切責之。遂除三人名。洪先歸。益尋求守仁學。甘淡泊。鍊寒暑。躍馬挽強。考圖觀史。自天文地志。禮樂典章。河渠邊塞。戰陣攻守。下逮陰陽算數。靡不精究。至人才吏事。國計民情。悉加意諮訪。曰。苟當其任。皆吾事也。邑田賦多宿弊。請所司均之。所司卽以屬洪先。精心體察。弊頓除。歲饑。移書郡邑。得粟數千石。率友人躬賑給。流寇入吉安。王者失措。爲畫策戰守。寇引去。素與順之友善。順之應召。欲挽之出。嚴嵩以同鄉故。擬假邊才起用。皆力辭。洪先雖宗良知學。然未嘗及守仁門。恒舉易大傳。寂然不動。周子無欲故靜之旨。以告學人。又曰。儒者學在經世。而以無欲爲本。惟無欲。然後出而經世。知精而力鉅。時王畿謂良

知自然。不假纖毫力。洪先非之曰。世豈有現成良知者耶。雖與畿交好。而持論始終不合。山中有石洞。舊為虎穴。葺茅居之。命曰石蓮。謝客默坐一榻。三年不出戶。初告歸。過儀真。同年生主事項喬為分司。有富人坐死。行萬金求為地。洪先拒。不聽。喬微諷之。厲聲曰。君不聞志士不食在溝壑耶。江漲壞其室。巡撫馬森欲為營之。固辭不可。隆慶初。贈光祿少卿。諡文莊。

明史藁

列傳第五十七終

明史藁

列傳第五十八

光祿大夫

經筵講官明史總裁戶部尚書加七級臣王鴻緒奉

敕編撰

張寧

王徽

王

淵

朱

寬

毛弘

丘弘

李森

李

鈞

鄭巳

强珍

王

瑞

張稷

李俊

崔

陞

盧

綱

蘇

章

周

軫

王純

汪奎

從子

舜民

高

瑶

李應禎袁慶祥

虎臣

張寧字靖之。海鹽人。景泰五年進士。授禮科給事中。七年夏。帝從唐瑜等奏。考覈南京大小諸臣。寧言。京師尤根本地。不

當獨免。又言京衛帶俸武職一衛至二千餘人。通計三萬餘員。歲需銀四十八萬。米三十六萬。并他折俸物。動經百萬。耗損國儲。莫甚於此。而其間多老弱。不嫻騎射之人。莫若簡可者。補天下都司衛所缺官。而悉汰其餘。議格不行。帝得疾。適遇星變。詔罷明年元會。百官朝參如朔望。寧言。四方來覲。不得一覩天顏。疑似之際。必至訛言相驚。願勉循舊典。用慰人心。帝疾不能從。而奪門之變作。天順中。曹石竊柄。事關禮科者。寧輒裁損。英宗以是知寧。朝鮮讐殺毛憐。詔寧偕都指揮武忠往解。寧辭義慷慨。而忠驍健。張兩弓折之。射鴈一發墜。朝鮮人大驚服。兩人竟解其讐而還。中官覃包邀與相見。不往。尋擢都給事中。憲宗初御經筵。請日以大學衍義進講。皇

太后生辰。姚夔等請設齋建醮。百官赴壇行香。寧言無益。徒傷大體。疏入乃止。寧負志節。持正議。聲稱籍甚。然不為大臣所喜。英宗嘗欲重用之。弗果。憲宗立。給事中王徽以言事得罪。寧率六科論救。由是更與內閣忤。會王竑等薦寧。堪僉都御史清軍職。黃得旨會舉多私。寧予外任。乃出為汀州知府。期年善政具舉。寧才高。既出守。鬱鬱不得志。竟致仕而去。家居三十年。言者屢薦。終不復召。無子。有二妾。寧歿。剪髮誓死。樓居不下者四十年。詔旌為雙節。武忠女直人。宣宗時嘗奉使諸衛。有撫安功。累官都督同知。

王徽字尚文。應天人。天順四年進士。除南京刑科給事中。憲宗卽位數月。與同官王淵朱寬李翔李鈞疏四事。末言自古

宦官賢良者少。奸邪者多。若授以大權。致令敗壞。然後加刑。是始愛而終殺之。非所以保全之也。願法高皇帝制。毋許預政典兵。置產立業。家人義子。悉編原籍。爲民嚴禁。官吏與之交接。惟厚其賞賚。使得富足。無復他望。此國家之福。亦宦官之福也。其冬。帝入萬妃譖廢吳后。罪中官牛玉。擅易中宮。謫之南京。徽復率淵等劾之。曰。陛下冊立中宮。此何等事。而賊臣牛玉。乃大肆奸欺。中官旣退。人情咸謂玉必萬死。顧僅斥陪京。猶全首領。則凡侍陛下左右者。將何所忌憚哉。內閣大臣。身居輔弼。視立后大事。漠然不以加意。方玉欺肆之初。婚禮未成。禮官畏權。輒爲阿附。及玉事發之後。國法難貸。刑官念舊。竟至苟容。而李賢等又坐視成敗。不出一言。黨惡欺君。

莫此爲甚。請并罪賢等。爲大臣不忠者戒。臣等前疏。請保全宦官。正欲防患於未萌。乃防患未聞。宦官之禍果作。然往不可諫。來猶可追。臣等不敢遠引。請以近事徵之。正統末有王振矣。詎意復有曹吉祥。天順初有吉祥矣。詎意復有牛玉。若又不思預防。安知後不有甚於玉者哉。預防之道無他。不過臣等嚮所言三事而已。請爲陛下極言之。宦者無事之時。似乎恭慎。一聞國政。卽肆奸欺。將用某人也。必先賣之以爲己功。將行某事也。必先泄之以張己勢。迨趨附日衆。威權日隆。而禍作矣。此所以不可預聞國政也。內官在帝左右。大臣不識廉恥者。多與交結。餽獻珍奇。伊優取媚。內官卽以爲賢。而朝夕稱譽之。有方正不阿者。卽以爲不肖。而朝夕讒謗之。日

加浸潤。未免致疑。由是稱譽者獲顯。讒謗者被斥。恩威盡出於其手。而禍又作矣。此所以不可許其交結也。內官弟姪。授職任事。倚勢怙權。聚奸養惡。廣營財利。頤指將帥。凌壓官司。作奸犯科之輩。奔走爲其爪牙。由是徒黨日盛。表裏交通。而禍又作矣。此所以不可使其子姪。在外任職。營立家產也。臣等有懷欲吐。雖死不悔。惟陛下裁察。帝大怒。欲加罪。諸給事御史交章論救。乃竝謫州判官。徽得貴州普安。淵茂州。寬潼川。翔寧州。鈞綏德。侍郎葉盛。編修陳音。相繼請留不納。最後御史楊琅言尤切。幾得罪。徽至普安。興學勸教。士始有舉於鄉者。却土官隴暢。及白千戶賄。治甚有聲。居七年。棄官歸。言者屢薦。終以宦官惡之。不復錄。弘治初。吏部尚書王恕薦起

陝西左參議。踰年謝病還卒。年八十三。子韋見文苑傳。淵。浙江山陰人。天順元年進士。除南京吏科給事中。素伉直。終順天府治中。寬。莆田人。翔。大足人。皆天順元年進士。鈞。永新人。景泰中進士。寬爲南京禮科給事中。翔兵科。鈞工科。旣被謫。寬進表入京道卒。翔鈞皆以判官終。

毛弘字士廣。鄞人。登天順初進士。六年。授刑科給事中。成化三年夏。偕六科諸臣上言。比塞上多事。正陛下宵衣旰食時。乃聞退朝暇。頗事逸遊。袍聲數聞於外。非禁城所宜有。况災變頻仍。兩畿水旱。川廣兵革之餘。公私交困。願省游戲宴飲之娛。停金豆銀豆之賞。日御經筵。講求正學。庶幾上解天怒。下慰人心。御史展毓等亦以爲言。皆嘉納。帝從學士商輅請。

自改元後。建言罷官者。悉錄用。弘請斷自踐阼以後。召還給事中王徽等。不許。慈懿太后崩。詔別葬。弘偕魏元等疏諫。未得請。朝罷。弘倡言曰。此大事。吾輩當以死諫。請合大小臣。工伏闕固爭。衆許諾。有退却者。給事中張賓呼曰。君輩獨不受國恩乎。何爲首鼠兩端。乃伏哭文華門。竟得如禮。弘在垣中。所論列最多。聲震朝宇。帝頗厭苦之。嘗曰。昨日毛弘。今日毛弘。前後所陳。或不見聽。而弘慷慨論議。無所屈。欽天監正谷濱。受賅當除名。命輸贖貶秩。正一真人張元吉。有罪論死。詔繫獄。弘等皆固爭。終不聽。三遷至都給事中。得疾暴卒。丘弘字寬叔。上杭人。天順末進士。授戶科給事中。成化初上言。水旱相仍。天變屢見。或征歛苛急。流移未輯。或土木漸興。財用

不節。或賞罰過當。請屬肆行。內嬖鮮恭順之節。左右無正直之人。讜言莫褒。忠鯁見斥。願陛下痛加修省。盡反前政。因條上時務十一事。帝頗納之。三年。寧夏地震。上修德弭災七事。明年春。偕同官上言。洪武永樂間。以畿輔山東土曠人稀。詔聽民開墾。永不科稅。邇者權豪怙勢。率指爲閒田。朦朧奏乞。如嘉善長公主。求文安諸縣地。西天佛子劄實巴。求靜海縣地。多至數十百頃。夫地踰百頃。古者百家產也。豈可徇一人私請。而奪百家恒產哉。帝納其言。詔自今請乞皆不許。著爲令。劄實巴所乞地。竟還之民。弘再遷。至都給事中。六年夏。山東河南大旱。弘請賑。因言四方告災。部臣拘成例。必覆實始免。上雖蠲租。下鮮實惠。請自今遇災。撫按官勘實。卽與蠲除。

從之。萬貴妃有寵。中官梁芳陳喜爭進淫巧。奸人屠宗順輩日獻奇異寶石。輒厚酬之。糜帑藏百萬計。有因以得官者。都人傲傲競尚侈靡。僭擬無度。弘偕同官疏論宗順等罪。請追還帑金。嚴禁侈俗。事下刑部。尚書陸瑜因請寘宗順等於理。沒其貲以賑饑民。帝不許。但命僭侈者罪無赦。然竟不能禁也。京師歲歉米貴。而四方游僧萬數。弘請驅逐以省冗食。又請發太倉米減價以糶。給貧民最甚者。帝悉從之。復言在京百獸房及清河寺諸處。所育珍禽野獸。日飼魚肉米菽。乞並縱放。以省冗費。報聞。明年使琉球道卒。弘風節與毛弘相似。人稱二弘云。

李森字時茂。歷城人。天順六年進士。授戶科給事中。負氣敢言。憲宗初。請禁朝覲官。科斂徵求。爲民害者。頃之言爵位天下之公器。國家之大柄。近有無功而晉侯伯。都督者。有涼德薄才位。九列者。有以畫奕彈琴醫卜技能得官職者。名爵日輕。官方日雜。是玩公器棄大柄也。自今宜擇人授。毋令匪才夤緣競進。已又請嚴軍官黜陟。覈逃伍虛糧。多報可。御史謝文祥以劾姚夔下獄。森偕同官救之。不納。明年夏日食。瓊山縣地震。森疏陳十事。未幾以貴倖侵奪民產。率諸給事言。昔奉先帝敕。皇親強占軍民田者。罪毋赦。投獻者戍邊。一時貴戚莫敢犯。比給事中丘弘等奏絕權貴請乞。陛下亦旣俯從。乃外戚錦衣指揮周彧求武強武邑田六百餘頃。翊聖夫人劉氏求通州武清地三百餘頃。詔皆許之。何其與前敕悖也。

彼谿壑難厭。而畿內膏腴有限。小民衣食皆出於此。一旦奪之。何以爲生。且本朝百年來。戶口日滋。安得尚有閒田不耕不稼。名爲奏求。實豪奪而已。帝善其言。而已賜者仍不問。山西災。山東及杭紹嘉湖大水。森等請蠲賑。帝並從之。萬貴妃專寵。後宮莫得進。致帝未有儲嗣。言者每勸上普恩澤。然未敢顯言妃妬也。惟森抗章爲言。帝心愠。欲假事斥之。時森已再遷左給事中。會戶科都給事中缺。吏部列森名上。詔予外任。部擬興化知府。猶不允。乃出爲懷慶通判。未幾投劾歸。不復出。

魏元字景善。朝城人。天順四年進士。授禮科給事中。成化初。萬貴妃兄弟驕橫。元疏劾之。四年慈懿太后崩。將別葬。元偕

同官三十九人。抗章極諫。御史康永韶亦偕同官四十一人。爭之。伏哭文華門。竟得如禮。其年九月。彗星見。元率諸給事上言。入春以來。災異屢至。近又彗星見東方。光拂台垣。皆陰盛陽微之證。臣聞君之與后。猶天之與地。不可得而參貳也。傳聞宮中。乃有盛寵匹耦中官。尚書姚夔等。向嘗言之。陛下謂內事。朕自裁置。屏息傾聽。將及半載。而昭德宮進膳。未少減。中官未聞少增。夫宮闈雖遠。而視聽猶咫尺。衽席之微。謫見懸象。不可不懼。且陛下富有春秋。而震位尚虛。豈可以宗社大計。一付之愛專情一之人。而不求所以固國本安民心哉。願明伉儷之義。嚴嫡妾之防。俾尊卑較然。各安其分。本支百世之基。實在於此。四方旱潦相仍。民困日棘。荆襄流民。所

在告變。陛下作民父母。初無怵惕。僅循故事。付部施行。而戶部尚書馬昂。凡有奏報。遇上意喜。則曰移所司處置。遇上意怒。則曰事窒難行。微有利害。卽乞聖裁。首鼠依違。民更何望。惟亟罷征稅。發內帑。遣官賑贍。庶可少慰人心。陛下崇信異教。每遇生愍之辰。輒重糜貲財。廣建齋醮。而西僧劉實巴等。至加法王諸號。賜予駢蕃。出乘樓輿。導用金吾仗。搢紳爲避道。奉養過於親王。悖理亂紀。孰甚於此。乞革奪名號。遣還其國。追錄橫賜。用賑饑民。仍敕寺觀。永不得再請齋醮。以盡國用。天下之財。不在官則在民。今公私交困。由玩好太多。賞賚無節。或營立塔寺。或購市珍奇。一物之微。累價鉅萬。國帑安得不絀。願屏絕淫巧。停罷宴游。諸銀場及不急務。悉爲禁止。

至兩京文武大臣。不乏好貪。爭爲蒙蔽。陛下勿謂其位高而
不忍遽去。勿謂其舊臣而姑且寬容。宜令各自陳免。用全大
體。其貪位不去者。則言官糾劾。而臣等濫居言路。無補於時。
亦望罷歸。爲不職戒。帝優詔褒答之。然竟不能用。元屢遷都
給事中。出爲福建右參政。巡視海道。嚴禁越海私販。巨商以
重寶賂。元怒叱出之。母憂歸。廬墓三年。復除江西參政。永
韶字用和。祁門人。舉於鄉。入國學。選授御史。成化初。巡按畿
輔。劾尚書馬昂抑市民地。四年。偕同官胡深鄭已等。爭慈懿
太后山陵事。彗星見。復偕同官上疏。言大本未立。異端太盛。
進退賞罰未公。財用工役未省。賑濟無策。備禦無方。凡八事。
大旨與元疏相類。帝亦優詔答之。翌日同官胡深陳宏鄭已

何純方昇張進祿復上疏請帝斥邪奸痛詆學士商輅兵部尚書程信禮部尚書姚夔戶部尚書馬昂謂此數人致天譴帝不納翌日早朝給事中董旻陳鶴胡智亦劾輅等疏呈御前故事諫官彈章非大廷宣讀則封進未有不讀而面呈者帝不悅曰大臣進退有體旻等敢不循舊章亂朝儀耶輅等乞休帝唯聽昂去夔憤甚連疏求去旻深等復合詞攻而詆夔尤甚帝怒下旻等九人獄會御史林誠亦嘗劾輅引病乞歸帝并屬誠吏給事中毛弘等論救輅亦請寬之乃各杖二十復其官帝既納元永韶疏命兩京大臣考察庶寮而去留多不當永韶等復劾大臣行私且摘刑部主事余志等十二人罪請并奪職帝不從但命不稱者考滿日奏黜志秩滿懼

失官上章自辨且訐永韶及御史馮徽吳遠奸利事永韶等亦訐辨不已俱下詔獄先是徽遠語給事中蕭彥莊聞上欲自除兩京大臣我輩將言其不便請仍歸吏部彥莊劾尚書李秉遂以其語聞帝銜之至是獄具言諸所訐皆虛惟徽遠語實乃調永韶志外任貶徽遠州判官永韶得順昌知縣再調福清惠安久之有薦其知天文者中旨召還授欽天監正進太常少卿掌監事永韶爲御史有直聲及是見帝惑左道權倖用事乃更迎合取寵占候多隱諱甚者以災爲祥陝西大饑永韶言今春星變當有大咎賴秦民饑死足當之誠國家無疆福帝甚悅中旨擢禮部右侍郎仍掌監事坐曆多訛字落職歸深定遠衛人嘗按陝西諸大臣旣被劾惡深未幾

坐以按陝時杖殺訴冤者。謫黔陽丞。稍遷鬱林知州。卒。已山海衛人。六年。巡按陝西。請蠲邊地逋賦。而分別邊兵。令壯者戰守。老弱耕牧。章下。所司定西侯蔣琬鎮甘肅。已欲按其罪。語洩。為所劾。戍宣府。琬有內援。已又大臣所忌也。然已性矜傲。時論不甚惜。旻樂平人。進吏科都給事中。為吏所託。下詔獄。謫石臼知縣。孝宗時。卒。官四川參議。

強珍字庭貴。滄州人。成化二年進士。除涇縣知縣。請減額賦。民懷之。擢御史。初遼東巡撫陳鉞啓。釁召敵。敵至。務為蔽欺。巡按御史王崇之劾鉞。并及總兵官歐信。中官葉達。鉞大恐。謀之汪直。誣逮崇之。下詔獄。輸贖。調延安推官。及直鉞用兵。方論功。而敵大入。中官韋朗總兵官緱謙等。匿不以聞。鉞遂

入為戶部尚書。珍往巡按。請正鉞罪。兵部尚書余子俊等。奏鉞累犯重辟。不當貸。帝弗從。未幾。指揮王全等誘殺朶顏衛人。珍發其狀。全等俱獲罪。直方自矜有大功。聞珍疏怒。適巡邊還。鉞郊迎五十里。訴珍誣已。直益怒。奏珍所劾皆妄。詔遣錦衣千戶蕭聚往。勘械赴京。比至。直先自撈掠。然後奏聞。坐奏事不實。當輸贖。詔特謫戍遼東。而責兵部及言官。先嘗劾鉞者。居三年。直敗。復珍官。致仕。弘治初。起山東副使。擢大理少卿。明年。以右僉都御史。巡撫宣府。時緱謙已罷。珍奏謙才力尚可用。請留之於邊。給事中言。謙數失機。珍不應奏保。遂改南京右通政。尋以母老乞休。久之卒。

王瑞字良璧。望江人。成化五年進士。授吏科給事中。嘗於文

華殿抗言內寵滋甚。詞氣鯁直。帝震怒。同列戰慄。瑞無懼色。十五年疏請。令天下進表官。各陳地方利病。帝惡其紛擾。杖之。湖廣江西撫按官。以所部災傷盜起。請免有司朝覲。瑞等言。歲侵民困。由有司不職。正當加罪。乃爲請留。正官旣留。則人才進退。何由審辨。是朝覲考察兩大典。皆從此廢壞矣。帝然其言。卽命吏部禁之。進都給事中。言三載黜陟。朝廷大典。今布按二司賢否。由撫按牒報。其餘由布按評覆。任情毀譽。多至失真。舉劾謬者。請連坐。十九年冬。瑞以傳奉冗員。淆亂仕路。率同官奏曰。祖宗設官有定員。初無倖進之路。近始有納粟冠帶之制。然止榮其身。不任以職。今倖門大開。鬻販如市。恩典內降。遍及胥吏矣。武階蔭叙。下逮白丁。或選期未至。

超越官資。或外任雜流。驟遷京職。以至廝養賤夫。市井童稚。皆得攀緣。妄竊名器。踰濫至此。有識寒心。伏覩英廟復辟。景泰倖用者。率皆黜罷。陛下臨御。天順冒功者。一切革除。乞斷自宸衷。悉皆斥汰。以存國體。御史張稷等亦言。比來末流賤技。妄廁公卿。屠狗販繒。濫居清要。文職有不識一丁。武階亦未挾一矢。白徒驟貴。閱歲頻遷。或父子並坐一堂。或兄弟分踞各署。甚有軍匠逃匿。易姓進身。官吏犯贓。隱罪希寵。一日而數十人得官。一署而數百人寄俸。自古以來。有如是之政。令否也。帝得疏。意頗動。居三日。貶李孜省。凌中等四人秩。奪黃謙。錢通等九人官。人心快之。明年正月。太監尚銘罷斥。而其黨李榮。蕭敬。猶用事。瑞等復奏劾之。不從。瑞居諫垣十餘

年遷湖廣右參議謝病歸卒。

李俊字子英岐山人。成化五年進士。除吏科給事中。屢遷都給事中。十五年。帝以李孜省爲太常寺丞。俊偕同官言。孜省本賊吏。不宜玷清班。奉郊廟百神祀。會御史亦有言。乃改上林監副。時江直竊柄。陷馬文升牟俸遣戍。帝反責言官不糾。俊及同官二十七人。御史王濬等二十九人。合詞引罪。詔杖之。當是時。帝耽於燕樂。羣小亂政。屢致災譴。至二十一年正月朔。申刻有星西流。化白氣。聲如雷。帝頗懼。詔求直言。俊率六科諸臣上疏曰。今之弊政最大且急者。曰近倖于紀也。大臣不職也。賞爵太濫也。工役過煩也。進獻無厭也。流亡未復也。天變之來。率由於此。夫內侍之設。國初皆有定制。今或一

監而叢一二十人。或一事而參五六七輩。或分布藩郡。享王者之奉。或總領邊疆。專大將之權。或依憑左右。援引儉邪。或交通中外。投獻奇巧。司錢穀則法外取財。貢方物則多端責賂。兵民坐困。官吏蒙殃。殺人者見原。僨事者逃罪。如梁芳輩。與陳喜輩。不可枚舉。惟陛下大施剛斷。無令于紀。奉使於外者。悉爲召還。用事於內者。嚴加省汰。則近倖戢。而天意可回矣。今之大臣。其未進也。非夤緣內臣。則不得其進也。非依憑內臣。則不安。此以財賈官。彼以官鬻財。無怪其漁獵四方。而轉輸權貴也。如尚書殷謙。張鵬。李本。侍郎艾福。杜銘。劉俊。皆旣老且懦。尚書張瑩。張瑄。侍郎尹直。大理卿田景暘。皆清論不愜。惟陛下大加黜罰。勿爲姑息。則大臣知警。而天意可

回矣。夫爵以待有德，賞以待有功也。今或無故而爵，庸流或無功而賞，一貴倖。祈雨雪者得美官，進金寶者射厚利，方士獻煉服之書，伶人奏曼延之戲，掾史胥徒皆叨官祿，俳優僧道亦玷班資。一歲而傳奉或至千人，數歲則數千人矣。數千人之祿，歲以數十萬計，是皆國之命脈，民之脂膏，可以養賢士，可以活饑民，誠可惜也。方士道流如左通政李孜省、太常少卿鄧常恩輩，尤為誕妄。此招天變之甚者，乞盡罷傳奉之官，毋令汙玷朝列，則爵賞不濫，而天意可回矣。今都城佛刹迄無寧工，京營軍士不復遺力，如國師繼曉假術濟私，糜耗特甚。中外切齒，願陛下內惜資財，外惜人力，不急之役，姑賜停罷，則工役不煩，而天意可回矣。近來規利之徒，率假進

奉，以耗國財。或錄一方書，市一玩器，購一畫圖，製一簪珥，所費不多，獲利十倍。願陛下洞燭此弊，留府庫之財，為軍國之備，則進獻息，而天意可回矣。陝西河南山西赤地千里，屍骸枕籍，流亡日多，萑苻可慮。願體天心之仁愛，憫生民之困窮，追錄貴幸鹽課，暫假造寺資財，移賑饑民，俾苟存活，則流亡復，而天意可回矣。夫天下譬之人身，入主元首也，大臣股肱也，諫官耳目也。京師腹心也，藩郡軀幹也。大臣不職，則股肱痿痺，諫官緘默，則耳目塗塞。京師不戢，則腹心受病，藩郡灾荒，則軀幹削弱。元首豈能晏然而安哉？伏望陛下聽言必行，事天以實，疏斥羣小，親近賢臣，咨治道之得失，究前代之興亡，以聖賢之經代方書，以文學之臣代方士，則必有正誼足

以廣聖學。讜論足以究天變。而手足便利。耳目聰明。腹心安泰。軀幹強健。元首於是乎大明矣。帝優詔荅之。降汝省上林丞。常恩本寺丞。繼曉革國師爲民。令巡按御史追其誥。敕制下。舉朝大悅。而帝心甚嫌之。尋以事出俊於外。時九卿各條奏數事。率有所避。無甚激切者。惟俊與御史汪奎等言最直。而武選員外郎崔陞。彭綱。主事蘇章。戶部主事周軫。刑部主事李旦。皆有言。陞章言。宦官妖僧罪。請亟誅竄。而尚書王恕。今伊傅不宜置南京。綱斥李汝省。繼曉。請誅之以謝天下。軫亦請誅梁芳。李汝省。并汰內侍。罷方書。旦陳十事。且言神仙佛老。外戚女謁。聲色貨利。奇技淫巧。皆陛下素所惑溺。而左右近習。交相誘之。言甚切。帝以方修省皆不罪。而心怒諸臣。

甚。後以吏盜粥舊賜外蕃。故敕事。下章綱。吏貶之外。而密諭吏部尚書尹旻。出旦等。且書六十人姓名於屏。俟奏遷。則貶遠惡地。旦乃與給事中盧瑀。秦昇。童祝。同日俱謫。部臣見遠謫者多。有應遷者。輒故遲之。陞軫遂得免。俊弘治中。累官山西參政。卒。陞字廷進。本樂安人。父爲彰德庫大使。因家焉。成化五年進士。由工部主事改禮。稍遷延安知府。四川參政。守官廉。居常服布袍。家僮拾馬矢給爨。家居三十年。年八十八卒。子銑。自有傳。章餘干人。由進士貶姚安通判。再遷延平知府。有政績。終浙江參政。綱清人。由進士貶永寧知州。改汝州。鑿渠溉田數千畝。再遷雲南提學副使。軫莆田人。副使瑛從子。由進士後進郎中。終山東運使。旦字啓東。獻縣人。由進士

貶鎮遠通判。未幾卒。瑀貶長沙通判。終廣平知府。昇貶廣安州同知。祝貶興國州同知。終袁州知府。皆由進士。瑀爲刑科給事中。疏蠲淮陽逋課十餘萬。清西北勒市戰馬宿弊。嘗觸帝怒。杖之。遷工科都給事中。與昇祝皆因星變。偕俊等獲譴者也。陞以請召王恕忤旨。而仙居王純由進士。爲工部主事。當成化時。恕爲南兵部尚書。詔罷其官。純抗章言不宜罷。竟杖之闕下。貶思南推官。弘治中。屢遷湖廣提學僉事。

汪奎字文燦。婺源人。成化初進士。爲秀水知縣。擢御史。二十一年星變。偕同官疏陳十事。言建言貶謫諸臣。効忠於國。宜復其職。妖僧繼曉。結中官梁芳。耗竭內藏。乞治芳罪。斬繼曉都市。傳奉官如顧賢等。皆中官恒從子。冒錦衣。李孜省小吏。

授通政。宜盡斥以清仕路。尚書殷謙。李本。侍郎杜銘。尹直。皆素乏清譽。尚書張鵬。張瑩。張瑄。侍郎杜謙。艾福。馬顯。劉俊。大理卿宋欽。巡撫都御史魯能。馬馴。皆老懦無能。侍郎談倫。奔競無恥。巡撫趙文博。粗鄙妄爲。大理卿田景暘。素行不謹。宜令致仕。鎮守守備內官。視天順間逾數倍。作威福虐有司。浙江張慶。四川蔡用得。逮治四品以下官。尤傷國體。宜悉撤還。內外坐管監鎗內官。增置過多。皆私役軍士。辦納月錢。多者至二三百人。武將亦皆私役健丁。行伍惟存老弱。宜嚴禁革。勲戚內官。奏乞鹽利。滿載南行。所至張欽。賜黃旗。商旅不行。邊儲虧損。宜嚴禁革。陝西山西河南。頻年水旱。死徙大半。山陝雖徵稅三分。其民僅存無幾。與全徵無異。宜核被災郡縣。

槩與蠲除。給事張善吉先坐罪謫官。考績至京。昏夜乞憐。得授茲職。大玷清班。宜罷黜。山陝河洛饑。民多流。鄖襄至骨肉相噉。請大發帑庾賑濟。銷弭他變。當是時。帝以災變求言。奎疏入。雖觸帝忌。未加譴。無何有御史失儀。奎當面糾。退朝乃奏。遂杖之於廷。居數月。復諭吏部。出奎爲夔州通判。雲陽有劇賊。討平之。孝宗立。量移叙州同知。以薦擢成都知府。歲饑。多盜。賑救多復業。三遷廣西左布政使。弘治十四年。以右副都御史。巡撫貴州。未浹歲。普安賊婦米魯作亂。被劾致仕。久之卒。從子舜民字從仁。成化中進士。授行人。擢御史。出按甘肅。劾中官將帥失事。陳邊計章疏十上。先是奎杖闕下。舜民扶掖之。帝聞而怒。至是奏獄情。帝忽摘其片詞。貶蒙化衛經

歷。弘治初。遷知東莞。未上。擢江西僉事。善讞獄。剖析如流。其清軍法。後人遵守之。改雲南屯田副使。田爲勢要奪者。釐而歸之官。麓川遺孽思祿。渡金沙江。據孟密。承檄撫定之。憂歸。服除。適淮揚大饑。以故官奉命賑濟。用便宜發粟。奏停不急務。活饑民百二十萬人。流冗復業者八千餘戶。進福建按察使。盜竊福清縣庫。或誣其怨家。已成獄。舜民廉得真盜。脫三十人於死。抵誣者罪。歲旱。禱不應。躬泣福州獄。釋枉繫輕罪者。所部有司皆清獄。遂大雨。歷河南左右布政使。正德二年。以右副都御史。撫治鄖陽。甫一月。罷。天下巡撫官。改涖南京。都察院道卒。奎性簡靜。不苟取與。以篤實見稱。而舜民好學。砥行。矯矯持風節。尤負時望。

月。抗疏陳十事。其一言正統己巳之變。先帝北狩。陛下方在東宮。宗社危如一髮。使非郕王繼統。國有長君。則禍亂何由平。鑾輿何由返。六七年間。海宇寧謐。元元樂業。厥功不細。迨先帝復辟。貪天功者。遂加厚誣。使不得正其終。節惠濟祀。未稱典禮。望特敕禮官集議。追加廟號。盡親親之恩。章下。廷議久不決。至十二月始奏。追崇廟號。非臣下敢擅議。惟陛下裁決。於是左庶子黎淳奏曰。陛下先時既立爲皇太子。則異時居天子位者。乃皇太子也。曾未半月。羣臣又立一親王爲天子。則前時所立之皇太子。將何爲哉。雖曰主少國疑。四方多事。然周成王之時。周公何不遂取天位。共和之際。周召何不

共分姬室。今若誤聽瑤言。一加郕王廟號。必將祭告太廟。改易舊主。而行祔廟承祧之禮。必將遷啓梓宮。改造山陵。而加珠襦玉匣之典。必將追贈皇太后皇后之稱。必當盡復當時所用之人。所行之政。且瑤此言有死罪二。一誣先帝爲不明。一陷陛下於不孝。陛下昔爲皇太子。郕王乃敢廢之。易以己子。至使先帝久遭幽閉。此非郕王所自爲。當時大臣陳循等。貪徇富貴。從臾爲之也。至於郕王有疾。宜請迎先帝復位。乃率羣臣奏乞早選元良。皇太子見在。欲選何人。非南城迎駕。先帝終於幽閉矣。陛下卽位之初。郕王時人。潛謀起用。陛下一切沮絕。羣邪破膽。及見召還商輅。然後欣然共以爲得計。希求進用。臣以謂瑤此舉。非欲尊郕王。特爲羣邪進用階也。

必有小人主之者。不然。彼草茅疎遠。安敢妄言惑聽哉。帝曰。景泰往過。朕未嘗介意。豈臣子所當言。淳爲此奏。欲獻諂希恩耶。議遂寢。然帝終感瑤言。久之。竟復郕王帝號。瑤後知番禺縣。多異政。發中官韋眷通番事。沒其貲鉅萬於官。爲布政使。陳選所獎。眷憾甚。誣奏於朝。瑤及選俱被逮。士民泣送者塞道。瑤竟謫戍永州。釋還卒。淳華容人。天順元年。進士第一。官至南京禮部尚書。頗有名譽。其與瑤爭郕王廟號也。專欲阿憲宗意。至以昌邑更始比景帝。爲士論所薄。當成化時。言路大阻。給事御史多獲譴。舍人李應禎。國子生袁慶祥。皆以言被杖。惟瑤以卑官建危議。卒無罪。時皆稱帝盛德云。應禎字貞伯。長洲人。景泰中。由鄉舉入國學。成化改元。以善書選

爲中書舍人。恥與雜流同列。乞改教職。不許。有謀直文華殿者。引應禎共事。益不樂。一日。帝命書佛經。辭不應。且上章曰。臣聞爲天下國家有九經。未聞有佛經也。帝大怒。撻於廷。因罷殿直。流民聚荆襄。朝議欲散遣之。應禎言。逐之祇益亂。不若因撫之。後卒增置府縣如其言。累遷兵部郎中。弘治初。歷太僕少卿。俱在南京。乞休歸。應禎尚義善文詞。爲時所重。慶祥。雩都人。國子生。以久次歷事內承運庫。見憲宗崇異教。任宦官。用財無度。帑藏虛耗。而進寶石掇高價者。月無虛日。乃上章極言其弊。忤旨杖五十。遣還國學。後二年舉進士。仕至廣東僉事。又有虎臣者。麟遊人。成化中。貢入太學。上言天下士大夫。過先聖廟。宜下輿馬。從之。省親歸。會陝西大饑。巡撫

鄭時將請賑。臣齋奏行。陳饑歉狀。詞激切。大獲賑貸。已上言。臣鄉比歲災傷。人相食。由長吏貪殘。賦役失均。請敕有司。審民戶。編三等。以定科徭。從之。孝宗踐阼。將建棕棚。萬歲山備登眺。臣抗疏切諫。祭酒費閭懼禍。及銀錙繫臣堂樹下。俄官校宣。臣至左順門。傳旨慰諭曰。若言是。棕棚已毀矣。閭大慚。臣名遂聞都下。頃之。命授七品官。乃以為雲南磻嘉知縣。卒官。

明史藁

列傳第五十八終

明史藁

列傳第五十九

光祿大夫 經筵講官明史總裁戶部尚書加七級臣王鴻緒奉敕編撰

徐溥

劉健

丘濬

謝遷

李東陽

王鏊

劉忠

徐溥字時用。宜興人。祖鑑瓊州知府。有惠政。溥景泰五年進士。及第授編修。憲宗初。擢左庶子。再遷太常卿兼學士。成化十五年。拜禮部右侍郎。尋轉左。久之。改吏部。孝宗嗣位。兼文淵閣大學士。參預機務。旋進禮部尚書。為給事中。方向御史曹璘等所劾。帝皆不問。弘治五年。劉吉罷。溥為首輔。屢加少

傅太子太傅。年七十引疾乞休。優詔不允。命風雨寒暑免朝。東宮出閣。加少師太子太師。進華蓋殿。以目眚三疏乞休。始許之。恩賚視常典有加。踰年卒。贈太師。諡文靖。溥性凝重。度量宏遠。居內閣十二年。其爲首輔。承劉吉恣睢之後。填以安靜。務守成法。與同列協心輔治。事有不可。輒共爭之。欽天監革職監正李華。爲昌國公張巒擇葬地。中旨復官。溥等言。卽位以來。未嘗有內降。倖門一開。末流安底。臣等不敢奉詔。太皇太后名崇王朝。溥等與尚書倪岳諫。帝爲請乃已。占城奏安南侵擾。帝欲遣大臣往解。溥等言。外國相侵。有司檄諭之足矣。若遣使萬一抗令。虧損國體。問罪興師。則坐耗中國。非計之得也。於是罷不遣使。詔撰三清樂章。溥等言。漢祀五帝。

儒者猶非之。况三清乃道家妄說耳。一天之上。安得有三大帝。且以周柱下史李耳當其一。以人鬼列天神。矯誣甚。國家設文淵閣。命學士居之。誠欲其謨謀政事。講論經史。培養本原。匡弼缺失。非欲其阿諛順旨。惟言莫違也。今經筵早休。日講久曠。異端邪說。得乘間入。此皆臣等無狀。不能爲陛下保初政。數月以來。奉中旨處分未當者。封還執奏。至再至三。願陛下曲賜聽從。俾臣等竭駑鈍。少有裨益。非但樂章一事而已。奏入。帝嘉納之。言官龐泮等六十二人。以言事下獄。溥等救得釋。帝自八年後。視朝漸晏。溥等常以爲言。帝雖納之。已復如故。中官李廣。以燒煉齋醮。寵十年二月。溥等上疏極論。曰。自洪武迄天順朝。常面召儒臣。咨訪政事。今朝參之外。不

得一望天顏。所恃以通下情者。惟在章奏。又不時斷決。或稽數月。或竟不施行。妨政體不小。經筵日講。所以成就君德。今每歲舉行。不過數日。夫人君一心。必有所繫。不繫於正。必繫於邪。近聞有以齋醮修煉之說進者。宋徽宗崇道教。科儀符籙最盛。卒至乘輿播遷。社稷傾覆。至若金石之藥。性多酷烈。一入腸腑。爲害百端。唐憲宗信柳泌以殞身。其禍可鑒。今龍虎山上。清宮神樂觀。祖師殿。及內府番經廠。皆焚燬無餘。彼如有靈。何不自保。天厭其穢。亦已明甚。陛下若親近儒臣。明正道行仁政。福祥善慶。不召自至。何假妖妄之說哉。自古奸人。蠱惑君心者。必以太平無事爲言。唐臣李絳有云。憂先於事。可以無憂。事至而憂。無益於事。今天下雖若無事。然工役

繁興。科斂百出。士馬罷敝。閭閻窮困。愁歎之聲。上干和氣。致熒惑失度。太陽無光。天鳴地震。草木興妖。四方奏報無虛月。將來之患。灼然可憂。陛下高居九重。言官皆畏罪緘默。臣等若不復言。誰復爲陛下言者。帝感其言。三月御文華殿。召見溥及劉健。李東陽。謝遷。授以諸司題奏。曰。與先生輩議。溥等擬旨上。帝應手改定。事端多者。健請出外詳閱。帝曰。盍就此面議。旣畢。賜茶而退。自成化間。憲宗召對彭時。商輅。後至此始再見。舉朝詡爲盛事。然倉卒不能悉稱。上旨。終溥在位。亦止此一名而已。尋以災異求言。廷臣所上封事。經月不報。而言官論救。何鼎忤旨待罪者久。溥等皆以爲言。於是悉下諸章而罷。諸言官弗問。孝宗向治。溥等所言多從。天下陰受其

福嘗曰。國家法度所以惠元元者備矣。患不能守耳。卒無所建白。溥性至孝。嘗再廬墓。自奉甚薄。好施予。置義田八百畝。贍宗族。請籍記於官。以垂永久。帝爲復其徭役。

劉健字希賢。洛陽人。父亮三原教諭。有學行。健少端重。與同邑閻禹錫。白良輔遊。從事伊洛之學。舉天順四年進士。改庶吉士。授編修。謝交遊。鍵戶讀書。人以木強目之。然練習典故。有經濟志。成化初。修英宗實錄。從憂中起復。固辭不許。書成。進修撰。三遷至少詹事。充東宮講官。受知於孝宗。既卽位。進禮部右侍郎。兼翰林院學士。入內閣。參預機務。弘治四年。進尚書兼文淵閣大學士。尋加太子太保。十一年。代徐溥爲首輔。健骨相奇古。學問深粹。正色敢言。無所依違。廉靖自守。獨

以身任天下之重。時太監李廣已死。清寧宮及軍器庫。番經廠相繼災。健與同列李東陽。謝遷。疏言。古帝王未有不遇災而懼者。比來奸邪熒惑。聖聽慢天。欺君。今元惡殄喪。聖心開悟。而餘慝未盡除。宿弊未盡革。望乘修省之際。進賢斥姦。明示賞罰。凡所當行。斷在不疑。毋更因循。以貽大患。帝方嘉納其言。而廣黨蔡昭等。旋取旨。予廣祭葬祠額。健等力諫。僅寢祠額。南北言官。指陳時政。頻有所論劾。一切皆不問。國子生江瑑。因劾健。東陽杜抑言路。二人引罪求罷。帝慰留之。下瑑於獄。二人力救釋瑑。清寧宮成。命灌頂國師那卜堅參等。設壇作慶贊事。健等極諫不納。十二年四月。大同告警。京師戒嚴。兵部請甄別京營諸將。帝乃召健及東陽。遷至平臺。出英

國公張懋等自陳疏。面議去留。乃去。遂安伯陳韶等三人。而名鎮遠侯顧溥督團營。時帝視朝頗晏。健等以爲言。領之而已。十四年秋。帝以軍興缺餉。屢下廷議。健等言。天下之財。其生有限。今光祿歲供。增數十倍。諸方織作。務爲新巧。齋醮日費鉅萬。太倉所儲。不足餉戰士。而內府取入。動四五十萬。宗藩貴戚之求土田奪鹽利者。亦數千萬計。土木日興。科歛不已。傳奉冗官之俸薪。內府工匠之餼廩。歲增月積。無有窮期。財安得不匱。今陝西遼東。邊患方殷。湖廣貴州。軍旅繼動。不知何以應之。望陛下絕無益之費。躬行節儉。爲中外倡。而令羣臣得畢獻其誠。講求革弊之策。天下幸甚。居數日。詔遣中官王瑞齋真武像及旛幢之屬。建醮武當山。令閣臣撰救及

祝辭。健等切諫不從。明年。詔擬釋迦啞塔像贊。健等爭之。乃止。先是五月。以災異。陳勤朝講節財用。罷齋醮。公賞罰數事。及冬。南京鳳陽大水。廷臣多言時政闕失。久之不下。健等因極陳怠政之失。請勵精圖治。章數上。竟不能盡從。帝事兩宮。太后甚謹。而兩宮皆好佛老。以故宮中多設齋醮。數遣中使進神袍于泰山。或白晝散燈市上。健等力諫。明年二月。詔建延壽塔朝陽門外。又除道士杜永祺等五人爲真人。令內閣撰誥。健等力諫。皆得寢罷。夏。小王子謀犯大同。帝召見閣臣。健請簡京營大帥。因言京軍怯不任戰。請自今罷其役作。以養銳氣。帝然之。退。乃條上防邊事宜。悉報允。未幾。邊警狎至。帝惑中官苗達言。銳欲出師。健與東陽遷。委曲阻之。帝意猶

未回。兵部尙書劉太夏亦言。京軍不可動。乃止。帝自十二年召對健等後。閣臣希得進見。及是在位久。益明習政事。數召見大臣。欲以次革煩苛。除宿弊。嘗論及理財。東陽極言鹽法弊壞。由陳乞者衆。因而私販數倍。健進曰。太祖時茶法始行。駙馬歐陽倫。以私販坐死。高皇后不能救。如倫事。孰敢爲陛下言者。帝曰。非不敢言。不肯言耳。遂詔戶部覈利弊。具議以聞。當是時。健等三人同心輔政。竭情盡慮。知無不言。初或有從有不從。旣乃益見信。所奏請無不納。每進見。帝輒屏左右。左右不得聞。從屏間竊聽。但聞帝數數稱善。時人爲之語曰。李公謀。劉公斷。謝公尤侃侃。及帝晚年。諸進退文武大臣。釐飭屯田鹽馬諸政。悉召閣臣面議。健翊贊爲多。馬文升。劉大

夏。韓文。戴珊等。悉布要地。健亦屢加少師。兼太子太師。與東陽遷同賜蟒衣。閣臣賜蟒。自健等始。帝寵任健等特甚。天下方想望太平。未幾帝疾大漸。召健等入乾清宮。受顧命。力疾起坐。自叙卽位始末甚詳。令近侍書之。已執健手曰。先生輩輔導良苦。東宮聰明。但年尚幼。好逸樂。先生輩常勸之讀書。輔爲賢主。健等欷歔頓首受命而出。翌日帝崩。武宗嗣位。東宮舊豎劉瑾。馬永成。谷大用。魏彬。張永。丘聚。高鳳。羅祥等八人用事。時謂之八黨。日導帝遊戲。由是怠於政事。健等釐諸弊政。凡孝宗所欲興罷者。悉以遺詔行之。而久廢格不舉。京師淫雨。自六月至八月。健等乃上言。陛下登極詔出。中外歡呼。今兩月矣。未聞汰冗員。幾何。省冗費。幾何。詔書所載。徒爲

空文。此陰陽所以失調。雨暘所以不若也。如監局倉庫城門及四方守備內臣。增置數倍。朝廷養軍若匠。費鉅萬計。僅足供其役使。寧可不汰。文武臣曠職債事。虛糜廩祿者。寧可不黜。畫史工匠。濫授官職者。多至數百人。寧可不罷。內承運庫歲支銀百餘萬。初無文簿司鑰。庫貯錢數百萬。未知有無。寧可不勾校。至如縱內苑珍禽奇獸。放遣先朝宮人。皆新政所當先。而陛下悉牽制不行。何以慰四海之望。帝雖溫詔荅之。而狎近羣小。左右宦豎日恣。增益且日衆。享祀郊廟。帶刀被甲。簇擁駕後。侈踰舊制。內府諸監局僉書。多者至百數十人。光祿日供。驟益數倍。蟒衣玉帶乘馬者。難以悉數。健等極陳其弊。報聞而已。正德元年二月。帝納戶部言。畿甸皇莊。合有

司徵課。每莊仍留宦官一人主之。健等言。皇莊旣以進奉兩宮。自宜悉委有司。不當仍主以私人。不省吏戶兵三部。及都察院。各有疏爭職掌。爲近習所撓。傳示帝意。令閣臣調旨。健等不奉命。別擬以奏。帝不聽。健等力諫。謂奸商譚景清之壞亂鹽政。北征將士之無功授官。武臣神英之負罪玩法。御用監書篆之濫用匪人。皆宜痛抑。今陛下不信大臣。而信羣小。欲以一人私恩。壞百年定制。臣等豈敢苟從哉。邇者地震天鳴。白虹貫日。恒星晝見。太陽無光。內賊縱橫。外寇猖獗。財匱民窮。怨謗交作。而中外臣僕。方且乘機作奸。排忠直。猶仇讎。保姦回如骨肉。日復一日。愈甚於前。禍變之來。恐當不遠。臣等受知先帝。叨任腹心。乃邇者旨從中下。畧不與聞。有所

擬議。竟從改易。職既曠矣。若復顧惜身家。共爲阿順。則罔上悞國。死有餘辜。所擬四疏。不敢更易。謹以原擬封進。不報。居數日。又言。臣等遭逢先帝。臨終顧命。以陛下爲託。刻骨銘心。誓以死報。邇者羣災疊異。併萃一時。天變於上。人怨於下。京師白晝殺人。邊塞巨寇犯順。戰則有兵。守則無食。軍民困敝。政務替弛。名器濫猥。風俗頹敗。歷觀載籍。未有如此而不亂者也。方且耽溺晏安。恬不覺悟。建言者以爲多言。幹事者以爲生事。累章執奏。謂之賣擾。釐剔弊政。謂之紛更。憂在於民生國計。則若罔聞知。事涉於近幸貴戚。則牢不可破。徇小人之佞詞。排舉朝之公論。臣等心知不可。義當盡言。比爲鹽法賞功諸事。極陳利害。拱俟數日。未聞玉音。若以臣等言是。宜

賜施行。所言非耶。亦當明加斥責。乃留中不報。視之若無。政出多門。咎歸臣等。宋儒朱熹有言。一日立乎其位。則一日業乎其官。一日不得乎其官。則不敢一日立乎其位。伏乞聖明矜察。特賜退休。帝優旨慰留之。疏仍不下。又數日。歷數政令十失。指斥貴戚近倖尤切。因再申前請。帝不得已。始下前疏。令所司詳議。健等知志終不行。各上章乞骸骨。帝不許。旣而所司議上。一如健等指。帝勉從之。由是諸失利者咸切齒。初孝宗山陵甫畢。健等卽請開經筵。及是帝失德滋甚。每當日講。率云朝謁兩宮。或云擇日乘馬。軍國大政。悉委近昵。中外莫不失望。健等深以爲憂。三月丁亥。上疏極陳怠學之失。且具述先帝彌留倦倦。屬以勤學。詞甚哀切。冀感動帝。竟不報。

六月復因災異上言。近日以來。免朝太多。遊戲漸廣。經筵日講。直命停止。不知陛下宮中。復有何事。急於此者。夫濫賞妄費。非所以崇儉德。彈射釣獵。非所以養人心。鷹犬狐兔。田野之物。不可育於朝廷。弓矢甲冑。戰鬥之象。不可施於宮禁。今聖學久曠。正人不親。直言不聞。下情不達。而此數者。雜交於前。臣不勝憂惑。帝曰。朕聞帝王不能無過。貴改過。卿等言是。朕當行之。健等乃錄廷臣所陳。時政尤要者。請置之坐隅。朝夕省覽。曰。無單騎馳驅。輕出宮禁。曰。無頻幸監局。泛舟海子。曰。無事鷹犬彈射。曰。無納內侍供食。疏入報聞。至八月。帝既大婚。健等請開講筵。命俟九月。至期。又命停午講。健等言。先帝時。每日必二講。今不可廢。不從。當是時。健等懇切疏諫者。

屢矣。帝終不能改。既而遣中官崔杲等督織造。乞鹽萬二千引。所司執奏。健等亦言不可。帝召至煖閣面議。頗有所詰問。健等皆以正對。帝不能難。最後正色曰。天下事。豈皆內官所壞。朝臣壞事者。十常六七。先生輩亦自知之。因言鹽引務。依杲請。健等退。再上章言不可。帝自愧失言。竟俞健等所奏。於是中外咸悅。以帝庶幾改過。健等乃謀去八黨。會言官交章請除之。健等持其章甚力。帝遣司禮詣閣曰。朕將改矣。其爲朕曲赦若曹。健等不可。言此皆得罪祖宗。非陛下所得赦。乞付法司。未報。復上言曰。人君之於小人。不知而誤用。天下尚望其知而去之。若既知而不治。則小人愈肆。君子愈危。不至於亂亡不已。且邪正無並立。今舉朝欲決去此數人。陛下又

知其罪。而故留之左右。非特朝臣疑懼。此數人亦不自安。上下相猜。中外不協。禍亂之機始此矣。不聽。健等以去就爭。永成等窘甚。相對涕泣。而尚書韓文等疏復入。於是帝命司禮八人。皆詣閣議。一日三至。欲安置之南京。遷欲遂誅之。謂處之未盡。健推案哭曰。先帝臨崩。執老臣手。付以大事。今陵土未乾。使若輩敗壞至此。臣死何面目見先帝。健遷聲色俱厲。惟東陽語少緩。八人中有王岳者。素剛厲疾邪。慨然曰。閣議是。健乃密屬岳。令與其儕范亨徐智助已。明日帝召諸大臣於左順門。健逆謂之曰。事且濟。公等第堅持。既而韓文抗聲數八人罪。岳等復爲帝言如健指。帝不得已許之。會暮。期明日逮捕。頃之事變。收岳等下詔獄。令瑾掌司禮。健遷遂乞致

仕。賜敕給驛歸。月廩歲夫猶如故事。健去瑾憾不已。尋矯旨列五十三人爲奸黨。榜示朝堂。以健爲首。又二年削籍爲民。追奪誥命。健家居杜門謝客。親知罕見其面。瑾誅復官致仕。後聞帝數巡遊。輒歎息不食曰。吾負先帝。世宗立。命行人齎勅存問。以司馬光文彥博爲比。賜賚有加。及年躋九十。詔撫臣就其第。致束帛餼羊上尊酒。官其孫成學爲中書舍人。嘉靖五年卒。年九十四。遺表數千言。勸帝正身勤學。親賢遠佞。帝震悼。賜卹甚厚。贈太師。謚文靖。健器局嚴整。正已率下。無黨無偏。朝退察家私謁。不交一言。許進輩七人。欲推焦芳入吏部。健曰。老夫不久歸田。此座卽焦有。恐諸公俱受其害耳。後七人者。俱爲芳所擠。如健言。東陽以詩文引後進。海內士

皆抵掌談文學。健若不聞。獨教人治經窮理。其事業光明俊偉。爲明世輔臣第一。楊一清罷相。世宗初起。官兵部尚書。提督三邊軍務。道洛陽謁健。健出見。語曰。汝嘗爲閣老。今復出爲總制。內閣體統。爲汝一人壞盡矣。我老不能對客。命二孫進一清茶。一清大慚而出。其伉直如此。孫望之進士。

丘濬字仲深。瓊山人。幼孤。母李氏教之讀書。過目成誦。家貧無書。嘗走數百里借書。必得乃已。舉鄉試第一。景泰五年成進士。改庶吉士。授編修。濬旣官翰林。見聞益廣。尤熟國家典故。成化中。秩滿進待講。與修英宗實錄。進待講學士。續通鑑綱目成。擢學士。遷國子祭酒。經生作文尚險怪。濬主南畿鄉試。分考會試。皆痛抑之。及是尤諄切告誡。返文體於正。尋進

禮部右侍郎。掌祭酒事。濬以真德秀大學衍義止述脩身齊家事。而於治國平天下闕焉。乃博採羣書以補之。書成。適孝宗嗣位。表上其書。帝稱善。特進禮部尚書。掌詹事府事。資金幣。下詔刊行。脩憲宗實錄。充副總裁。弘治四年書成。加太子太保。尋命兼文淵閣大學士。參預機務。尚書入內閣者。自濬始。時年七十一矣。濬以衍義補所載。皆可見之行事。請摘其要者奏聞。下內閣議行之。帝報可。明年濬上言。臣見成化時彗星三見。徧掃三垣。地五六百震。邇者彗星見天津。地震天鳴無虛日。異鳥三鳴於禁中。春秋二百四十年。書彗字者三。地震者五。飛禽者二。今乃屢見於二十餘年之間。甚可畏也。願陛下體上天之仁愛。念祖宗之艱難。止身清心以立本。而

應務謹好尚不惑於異端節財用不至於耗國公任使不失於偏聽禁私謁明義理慎儉德勤政務則承風希寵左道亂政之徒自不敢肆其奸而天災弭矣因列時弊二十二事帝納之六年以目疾免朝參濬在位常以寬大啓上心忠厚變士習顧性褊隘嘗與劉健議事不合至投冠於地言官建白不當意多面折之抑陳獻章莊梟與王恕不相得至不交一言六年大計羣吏恕所奏罷幾二千人濬請留九十人恕爭之不得而濬令太醫院判劉文泰訐恕爲潤色其疏稿恕竟坐罷人以此大不直濬給事中毛珵御史宋憲周津等交章劾濬不可居相位帝不問踰年加少保八年卒年七十六贈太傅諡文莊濬廉介所居邸第極湫隘四十年不易性嗜學

既老右目失明猶披覽不輟然議論多偏激而博辯足以濟之嘗譏范仲淹生事謂岳飛未必能恢復秦檜有再造功聞者無不駭正德中以巡按御史言賜祠於鄉曰景賢

謝遷字于喬餘姚人成化十年鄉試第一明年舉進士復第一授修撰累遷左庶子弘治元年春中官郭鏞請豫選妃嬪備六官遷上言三年之憂豈容頓忘祥禫之期歲亦不遠請俟諒陰既終徐議未晚尚書周洪謨等如遷議從之帝居東宮時遷已爲講官及是復與日講務積誠開帝意前夕必正衣冠習誦及進講敷詞詳切帝數稱善進少詹事兼侍讀學士八年詔同李東陽入內閣參預機務遷時居憂力辭服除始拜命進詹事兼官如故皇太子出閣加太子少保兵部尚

書兼東閣大學士。上疏勸太子親賢遠佞。勤學問。戒逸豫。帝嘉之。尚書馬文升以大同邊警。餉饋不足。請加南方兩稅折銀。遷曰。先朝以南方賦重。故折銀以寬之。今議加。恐民不堪命。且足國在節用。苟用度無節。雖加賦奚益。會尚書倪岳亦爭之。議遂寢。孝宗晚年。慨然欲釐弊政。而內府諸庫及倉場馬坊。中官作奸。亂法不可究詰。御馬監騰驤四衛勇士。自以禁軍不隸兵部。率空名支餉。其弊尤甚。遷承間言之。帝令擬旨禁約。遷曰。虛言設禁無益。宜令曹司搜剔弊端。明白奏聞。然後嚴立條約。有犯必誅。庶積蠹可去。帝俞允之。遷儀觀後偉。秉節直亮。與劉健李東陽同心輔政。而遷見事尤敏。天下稱賢相。武宗嗣位。屢加少傅。兼太子太傅。既數諫弗聽。因天

變求去甚力。帝輒慰留。及請誅劉瑾不克。遂與健同致仕歸。頒敕禮數俱如健。而瑾怨遷未已。焦芳既附瑾。亦憾遷。嘗舉王鏊自代。不及已。乃取中旨。勒罷其弟兵部主事迪。斥其子編修丕爲民。遣使四出偵察。無所得。則摭遷前爲內閣時。浙江應詔舉懷才抱德士。餘姚周禮徐子元許龍上虞徐文彪。皆遷同鄉。而草詔由健。欽因此爲罪。矯旨謂天下至大。豈無應詔者。何餘姚隱士之多耶。遂下禮等詔獄。屬主者詞連健。遷瑾持至閣。欲逮二人。籍其家。賴東陽力解。瑾意少釋。芳從旁厲聲曰。縱輕貸亦當除名。旣而旨下。果如芳言。禮等咸戍邊。吏部尚書劉宇阿瑾意。劾兩司以下訪舉失實。皆得罪。坐罰米。有削籍者。且詔自今餘姚人毋選京官。著爲令。未幾給

事中李憲御史顏正等請奪健遷及尚書馬文升劉大夏韓文許進等誥命爲奸回小人戒奪者六百七十五人當是時人皆爲遷危而遷與客圍棋賦詩自若瑾誅復職致仕世宗卽位遣使存問起廸參議不復官翰林遷乃遣子正入謝勸帝勤學法祖聽諫優旨荅之嘉靖二年復詔有司存問六年大學士費宏舉遷自代楊一清欲阻張璁亦力舉遷帝乃遣行人齎手敕卽家起之命撫按官敦促上道時遷年七十九矣不得已拜命比至而璁已入閣一清以官尊於遷無相下意遷居位數月力求去帝待遷愈厚以天寒免朝參除夕賜御製詩及以病告則遣醫賜藥餌光祿致酒餼使者相望於道遷竟以次年正月辭歸十年卒於家年八十有三贈太傅

諡文正廸仕至廣東布政使不鄉試第一進士及第歷官吏部左侍郎贈禮部尚書

李東陽字賓之茶陵人以成籍居京師四歲能徑尺書景帝召試之甚喜抱置膝上賜果鈔還其家後兩召講尚書大義稱旨命入京學天順六年年十六舉順天鄉試遂成進士選庶吉士授編修累遷侍講學士充東宮講官弘治四年憲宗實錄成由左庶子兼侍講學士進太常少卿兼官如故東陽盛有文名不爲當軸所喜至五年始得與講筵早災求言東陽條摘孟子七篇大義附以時政得失累數千言上之帝稱善閣臣徐溥等以詔敕繁請如先朝王直故事設官專領乃擢東陽禮部右侍郎兼侍讀學士入內閣專典誥敕八年以

本官直文淵閣參預機務與謝遷同日登用時政闕失輒借溥等盡言極諫東陽工古文辭閣中疏草必屬之疏出多爲人傳誦久之進太子少保禮部尚書兼文淵閣大學士十七年重建闕里廟成奉命往祭還上疏言臣奉使遄行適遇元旱天津一路夏麥已枯秋禾未種輓舟者無完衣荷鋤者有菜色盜賊縱橫青州尤甚南來人言淮揚諸府流亡載道掘齒而食江南浙東方數千里戶口消耗軍伍空虛庫無旬日之儲官缺累歲之俸東南財賦所出一歲之饑已至於此北地皆窳素無積聚今秋再歉何以堪之事變之生恐不可測言及於斯可爲痛哭臣自非經過其地則雖久處官曹日理章疏猶不得其詳况陛下高居九重之上者耶道路言冗食

太衆國用無經差役頻煩科派重疊京城土木繁興供役軍士財力交殫每遇班操寧死不赴勢家鉅族田連郡縣猶請乞不已親王之藩供億至二三十萬游手之徒託名皇親僕從每於關津都會大張市肆網羅商稅國家建都於北仰給東南商賈驚散大非細故更有織造內官縱羣小掊擊閭河官吏莫不奔駭鬻販窮民所在騷然此又臣所目擊者夫閭閻之情郡縣不得而知也郡縣之情廟堂不得而知也廟堂之情九重亦不得而知也始於容隱成於蒙蔽容隱之端甚小蒙蔽之禍甚深臣在山東伏聞陛下以災異屢見敕羣臣盡言無諱然詔旨頻降章疏畢陳而事關內廷貴戚者動爲掣肘累歲經時俱見遏罷誠恐今日所言又爲虛文乞取從

前內外條奏。詳加採擇。斷在必行。帝嘉歎。悉付所司。因再疏自劾求退。不許。明年。與劉健謝遷。同受顧命。武宗立。屢加少傅。兼太子太傅。數諫。帝失德。不見省。及劉瑾入司禮。與健等即日辭位。而東陽獨留。耻之。再疏懇請。不許。健等瀕行。東陽祖餞泣下。健正色曰。何哭爲。使當日力爭。與我輩同去矣。東陽嘿然。是時中外大權皆歸瑾。務摧抑縉紳。而焦芳旣入閣。助之虐。老成忠直士。放逐殆盡。東陽悒悒不得志。然遇傳免日。講日晏視朝。每拜疏切諫。瑾克暴日甚。無所不訕侮。於東陽猶陽禮敬。凡瑾所爲亂政。彌縫其間。亦多所補救。尚寶卿崔璿。副使姚祥。郎中張瑋。以違制乘肩輿。給事中安奎。御史張彧。以覈邊餉失瑾意。皆荷重校幾死。東陽力救。璿等謫戍。

奎彧得釋。三年六月朝退。有遺匿名書於御道。數瑾罪者。詔百官悉跪奉天門外。頃之。令大僚及翰林皆出。執庶僚三百餘人下詔獄。次日東陽等力救。未報。瑾廉知。乃同類所爲。衆獲宥。東陽又疏言數事。章下。所司覆奏。有所輕減。瑾大怒。矯旨詰責數百言。中外駭歎。瑾患盜賊日滋。欲戍其家屬。東陽力爭。或自陳捕盜七十人功。所司乞詰隣伍。及爲之囊橐者。將以新例處之。東陽言如是。則百年之案。皆可追論也。由是俱得免。東陽旣求去。不得。委蛇避禍。而焦芳疾東陽位已上。日夕搆之。瑾乃令人摘通鑑纂要小疵。爲東陽等罪。而除謄錄官數人名。欲因以及東陽。東陽大窘。度勢不能爭。屬芳與張綵爲解。乃已。瑾久亦安之。當其威虐烜赫時。東陽婉言。

曉譬屢見聽從。劉健謝遷劉太夏楊一清及平江伯陳熊輩。幾得危禍。皆賴東陽而解。其潛移默奪保全善類。天下亦陰受其庇。而氣節之士多非之。侍郎羅玘上書勸其早退。至請削門生籍。東陽得書。俛首長歎而已。焦芳既與中人爲一。王鏊雖持正。亦不能與瑾抗。東陽乃援楊廷和共事。差倚以自強。已而鏊辭位。劉宇代之。未幾去。繼以曹元。皆瑾黨也。以故東陽勢益孤。東陽前已加少師兼太子太師。後瑾欲加芳官。詔東陽食正一品祿。久之。摘會典中譌謬奪所加祿。居數日。以孝宗實錄成。旋復之。蓋東陽亦不免狎侮矣。五年春。帝以久旱。下詔恤刑。東陽等因上詔書。所未及者數條。帝悉從之。已法司劉璟等畏瑾減死者止二人。其秋瑾誅。東陽乃上疏。

自列曰。臣備員禁近。與瑾職掌相關。凡調職換勅。或被駁再三。或徑自改竄。或持回私室。假手他人。或遞出膳黃。逼令落藁。真假混淆。無從別白。臣雖委曲匡持。期於少濟。而因循隱忍。所損亦多。理宜黜罷。帝慰留之。以平寘鑄加特進左柱國。廕一子尚寶司丞。爲御史張芹所劾。帝怒奪芹俸。東陽亦乞休辭廕。不許。時焦芳曹元已罷。而劉忠梁儲入。政事一新。然張永魏彬馬永成谷大用等猶用事。帝嬉遊如故。皇子未生。多居宿於外。又議大興豹房之役。建寺觀於禁中。東陽等憂之。前後上章切諫。不報。霸州盜劉六等亂起。侍郎陸完方出師涿州。賊已至固安。京師震動。帝乃召對東陽廷和儲於左順門。欲召還完軍。東陽稱善。因言賊本烏合。朝廷賞罰明信。

使諸將効力。賊自不足平。帝曰然。遂慰勞賜羊酒而退。時帝久不接大臣。及是但荅問數言。無所獻替。人益責望東陽。七年。東陽等以京師及山西陝西雲南福建相繼地震。而帝講筵不舉。視朝久曠。宗社祭享不親。禁門出入無度。谷大用仍開西殿。屢上疏極諫。帝亦終不聽也。九載秩滿。兼支大學士俸。河南賊平。廢子世錦衣千戶。再疏力辭。改廢六品文官。其冬。帝欲調宣府軍三千入衛。而以京軍更番戍邊。東陽等力持不可。大臣臺諫皆以爲言。中官旁午索草敕。帝坐乾清宮門趣之。東陽等終不奉詔。明日竟出內降行之。江彬等遂以邊兵入豹房。小人愈得志矣。東陽以老疾乞休。前後章數上。至是始許。賜敕給廩隸如故事。又四年卒。年七十。贈太師。謚

文正。東陽事父淳有孝行。初官翰林時。常飲酒至夜深。父不就寢。忍寒待其歸。自此終身不夜飲於外。爲文典雅流麗。朝廷大著作。多出其手。工篆隸書。碑版篇翰。照耀四裔。獎成後進。推挽才彥。學士大夫。出其門者。率粲然有所成就。自明興以來。宰臣以文章領袖縉紳者。楊士奇之後。東陽而已。立朝五十年。清節不渝。旣罷政居家。購請詩文書篆者。填塞戶限。頗資以給朝夕。一日夫人方進紙墨。東陽有倦色。夫人笑曰。今日設客。可使案無魚菜耶。乃欣然命筆。移時而罷。其風操如此。故與楊一清善。及疾亟。一清視之。東陽以謚爲憂。一清曰。本朝無謚。文正者。請以奉公。東陽自牀上頓首謝。後竟得之。

王鏊字濟之。吳人。父琬。光化知縣。鏊年十六。隨父讀書國子監。諸生爭傳誦其文。侍郎葉盛提學御史陳選奇之。稱爲天下士。成化十年鄉試。明年會試俱第一。廷試第三。授編修。杜門讀書。避遠權勢。弘治初。遷侍講學士。充講官。中貴李廣導帝遊西苑。鏊講文。王不敢盤于遊田。反覆規切。帝爲動容。講罷。謂廣曰。講官指若曹耳。壽寧侯張繼故與鏊有連。及繼貴。鏊絕不與通。東宮出閣。大臣請選正人爲官僚。鏊以本官兼諭德。尋轉少詹事。擢吏部右侍郎。嘗奏陳邊計畧。言昨火篩入寇。大同危於倒懸。陛下宵旰不寧。命將出師。而緣邊諸將皆嬰城守。無一人敢當其鋒者。幸天誘其衷。使自解去。今急宜選將練兵。乃中外泰然。便若無事。此臣所不解也。今日可

畏者。在中國不在邊疆。火篩小王子不足畏。而嬖倖亂政。功罪不明。委任不專。法令不行。邊圉空虛。人心離散。深可畏也。請治副總兵姚信。擁兵不進之罪。起致仕尚書秦紘爲總制。輟傳奉之祿。以祿邊將。舍無名之賞。以賞邊民。又言科舉外。宜倣前代制科。如博學宏詞之類。以收異材。六年一舉。舉不過十餘人。其翹然出類者。授之翰林。餘補科道。部屬中書。先有官者加秩。數年之後。士類濯磨。必以通經學古爲高。脫去諛聞之陋。時不能用。尋以父憂歸。正德元年。起左侍郎。韓文諸大臣請誅劉瑾等八人。鏊與焉。俄瑾入司禮。大學士劉健謝遷相繼去。內閣止李東陽一人。瑾欲引焦芳。廷議獨推鏊。瑾固恨鏊。迫公論。遂命以本官兼學士。與芳同入內閣。踰月

進戶部尚書文淵閣大學士。明年加少傅太子太傅尚寶卿。崔璿等三人荷校幾死。璿謂瑾曰：士可殺不可辱。今辱且殺之。吾尚何顏居此？璿等得釋。瑾銜尚書文。必欲殺之。又欲以他事中健遷。璿前後力救得免。瑾與劉大夏有隙。逮至京。欲坐激變罪死。璿爭曰：岑氏未叛。何名激變？或惡楊一清於瑾。謂築邊牆糜費。璿爭曰：一清為國修邊。安得以功為罪？瑾議焚廢后吳氏喪以滅迹。曰：不可以成服。璿曰：服可以不成。葬不可薄也。景帝汪妃薨。疑其禮。璿曰：妃廢不以罪。宜復故號。葬以妃祭。以后皆從之。時中外大權悉歸瑾。璿初開誠與言。間聽納。而芳專嬖阿。瑾橫彌甚。禍流搢紳。璿不能救。蹙然見顏面。遂力求去位。疏三上許之。賜璽書乘傳。有司給廩隸。咸

如故事。家居十四年。廷臣交薦不起。世宗即位。遣行人存問。璿疏謝。因上講學親政二篇。帝優詔報聞。官一子中書舍人。嘉靖三年。復詔有司存問。未幾卒。年七十五。贈太傅。諡文恪。璿博學有識鑒。文章爾雅。議論明暢。晚著性善論一篇。士守仁見之曰：王公深造。世未能盡也。少善制舉義。後數典鄉試。程文冠一代。取士尚經術。險詭者一切屏去。弘正間。文體為一變。

劉忠字司直。陳留人。成化十四年進士。改庶吉士。授編修。弘治四年。憲宗實錄成。遷侍講直經筵。尋兼侍東宮講讀。又九年。進侍讀學士。武宗即位。以宮寮擢學士。掌翰林院。仍直經筵。正德二年。劉瑾用事。日導帝遊戲。亂祖宗舊章。忠上言戒

逸遊崇正學數事。已因進講與楊廷和附經義規帝闕失。而指斥近侍尤切。帝謂瑾曰。經筵講書耳。浮詞何爲。瑾素惡兩人。因諷吏部尚書許進。出之南京。南京無缺員。進特用爲禮部左侍郎。命下外議籍籍。進患之。甫兩月。卽擢忠本部尚書。其冬就改吏部。時留都一御史素驕橫。一郎中張綵所暱也。秩滿皆署下考。疾吏胥詭名寄籍。督諸郎核汰千人。大計京官。所黜殊多於前。又疏請不時糾劾。以示勸懲。無待六年考黜。詔可之。忠在南京。正直有風采。然是時瑾方以苛政折辱士大夫。忠顧附會其意。頗爲時論所短。未幾焦芳薦之瑾。瑾乃傳旨召忠。比至見忠負氣岸。悔之業已召。遂改吏部尚書。兼學士。專典制詔。兩疏乞休不報。瑾誅以本官兼文淵閣大

學士。入閣預機務。甫數日。以平寧夏功。加少傅。兼太子太傅。故事閣臣加官。無遽至三孤者。忠無功驟得。不自安。連疏固辭。不許。瑾雖誅。張永魏彬輩擅政。大臣復爭與交驩。忠獨無所顧。永嘗遣廖鵬謁忠。忠僕隸遇之。又却其餽。以故與永輩左。疏乞致仕。前後七八上。皆慰留。明年。以省墓請。會張永摘忠會試錄中語。拑之。李東陽力爲解。乃詔忠乘傳還。抵家再上章乞致仕。報許。給月廩。歲隸終其身。嘉靖初。屢薦不起。遣行人存問。忠奏謝。因有所獻納。帝褒其忠愛。嘉靖二年卒。年七十二。贈太保。諡文肅。


明史藁

列傳第五十九終

375
32

楊雲山八集列傳五十九

三



安政二年

